



Malo o Samoa

# FONO AOA O FAITULAFONO O SAMOA

RIPOTI FAALETAUSAGA

A LE

MATAGALUEGA O TINA MA TAMAITAI ATINAE O NUU  
MA AFIOAGA MA AGAFESOOTAI

Mo le tausaga faaletupe faaiuina ia Iuni 30, 2010

Ina ia tuuina atu i luma o le laulau a fono a le Fono Aoa o Faitulafono



MALO O SAMOA


OFISA O LE MINISITA O TINA MA TAMAITAI ATINAE O  
NUU MA AFIOAGA MA AGAFESOOTAI

Afioga i le Fofoga Fetalai

Fono Aoaofaitulafono o Samoa

Ina ia tusa ai ma le Vaega 18(2) o le Tulafono mo le Matagaluega o Tina ma Tamaitai 1990, Vaega 17(2) o le Tulafono mo le Matagaluega o le Lotoifale ma le Vaega 17(1) o le Tulafono a le Matagaluega o Tupulaga Talavou, Taaloga ma Aganuu, e ia te au le faaaloalo e tuuina atu ai i lau Afioga kopi o le Ripoti Faaletausaga lona ono a le Matagaluega o Tina ma Tamaitai Atinae o Nuu ma Afioaga ma Agafesootai, mo le tausaga amata mai ia Iulai 1 2009 seia oo ia Iuni 30 2010, mo le tuuina atu i luma o le Fono Aoaofaitulafono a Samoa.

O lenei ripoti o loo faamauina ai galuega sa faatinoina e le Matagaluega i totonu o le tausaga faaletupe lenei, ina ia tusa ai ma Tulafono pei ona taua i luga.

  
Afioga Fiamē Naomi Mataafa

MINISITA O TINA MA TAMAITAI ATINAE O NUU MA AFIOAGA  
MA AGAFESOOTAI

MALO O SAMOA


*Matagaluega o Tina ma Tamaitai Atinae o Nu'u ma Afioaga ma  
Agafesootai*

Afioga Fiamē Naomi Mataafa II

MINISITA O TINA MA TAMAITAI ATINAE O NUU MA AFIOAGA  
MA AGAFESOOTAI

Ina ia tusa ai ma le Vaega 18(2) o le Tulafono mo le Matagaluega o Tina ma Tamaitai 1990, Vaega 17(2) o le Tulafono mo le Matagaluega o le Lotoifale ma le Vaega 17(1) o le Tulafono a le Matagaluega o Tupulaga Talavou, Taaloga ma Aganuu 1993, e ia te au le faaaloalo e tuuina atu ai i lau Afioga kopi o le Ripoti Faaletatusaga lona ono a le Matagaluega o Tina ma Tamaitai Atinae o Nu'u ma Afioaga ma Agafesootai, mo le tausaga amata mai ia Iulai 1 2009 seia oo ia Iuni 30 2010.

O lenei ripoti o loo tuuina atu ai se ootoga o galuega faatino a le Matagaluega i lenei tausaga faaletupe, ina ia tusa ai ma tuutuuga o Tulafono pei ona taua i luga.



Leituala Kuiniselani Toelupe Tago

OFISA SILI O PULEGA MO LE MATAGALUEGA O TINA MA  
TAMAITAI ATINAE O NUU MA AFIOAGA MA AGAFESOOTAI

# FAASOLOGA O MATAUPU

## ITULAU

### UPU TOMUA A LE OFISA SILI O PULEGA

5

#### 1. VAEGA 1: MATAFAIOI MA LE VAAIGA TAULAI A LE MATAGALUEGA

|     |   |   |
|-----|---|---|
| 1.1 | <i>Vaaiga Taulai</i>                                    | 6 |
| 1.2 | <i>Manulauti</i>  | 6 |
| 1.3 | <i>Tulafono</i>   | 6 |
| 1.4 | <i>Sini Autu</i>  | 7 |
| 1.5 | <i>Matafaioi Autu</i>                                   | 7 |
| 1.6 | <i>Talitonuga Faavae ma Taiala e Faatino ai Galuega</i> | 7 |
| 1.7 | <i>Faatulagaina o le Matagaluega</i>                    | 8 |

#### 2. VAEGA 2: TULAGA UA AUSIA MA GALUEGA o le 2009/2010

|      |   |       |
|------|---|-------|
| 2.1  | <i>Fautuaga i Faiga Faavae ma Atinae Fuafuaina</i>  | 10-12 |
| 2.2  | <i>Pulega Lelei i Nu'u ma Taitaiga</i>  | 12-14 |
| 2.3  | <i>Faamalosia Nu'u ma Afioaga te Faafoe Faatino Polokalame Mo le Atinae o Agafesootai ma le Tamaoaiga</i> | 14-25 |
| 2.4  | <i>Unaia o Talitonuga i Avanoa Tutusa mo le Mauaina o Avanoa e Vaega Uma o le Atunuu</i>                  | 25-26 |
| 2.5  | <i>Pulega Faa Ofisa ma le Atinaeina o le Aufaigaluega</i>   | 26-28 |
| 2.6  | <i>Fetuunaiga ma le Aganuu Faale-Matagaluega</i>  | 28-29 |
| 2.7  | <i>Galuega ma Fonotaga Faaitulagi ma Faavaomalo</i>   | 29-31 |
| 2.8  | <i>Galuega mo Tagata e iai Manaoga Faapitoa</i>   | 31-32 |
| 2.9  | <i>Fesootaiga ma isi Vaega ma Galuega Soosootauau</i>   | 32-33 |
| 2.10 | <i>Auaunaga faa Lomitusi</i>  | 33-34 |

#### 3. VAEGA 3: ATINAEINA O LE AUFAGALUEGA

35-41

#### 4. VAEGA 4: TALA FAATATAU O LE TUPE (2009-2010)

42

#### 5. FAAFETAI

43

#### 6. FAASINO UPU

44

#### 7. PEPA FAAOPOPO

1: Auivi o Galuega Faatino - Auiliiliina o Galuega 2009-2010

## UPU TOMUA A LE OFISA SILI O PULEGA

O le lua a'i lenei o tausaga talu ona faatino le Fuafuaga Autasi 2008-2012 a le Matagaluega. I le faasologa mai o galuega o lenei tausaga, e tele ni fuafuaga ma ni faatinoga sa faatino na matauina ai ni tulaga lelei faapea foi ni tulaga le lelei mo le Matagaluega. O le aafiaga o le tamaoaiga o le lalolagi, ua faapea ona saga faaitiitia ai vaega tupe mo le Matagaluega, ma faapea ona toe fetuutuunai ai vaega e ave iai le faamuamua, ina ia mafai ona ausia galuega faatino e ala i le tala o le tupe faaletausaga.

O le aafia foi o le atunuu i le Galulolo, sa toe moomoia ai le fetuunai o le faagasologa o galuega, ona o o nisi o le aufaigaluega sa moomia e galulue i le taimi na tupu ai lenei faalavelave faalenatura, i le tufatufaina o fesoasoani mo nuu na aafia, aemaise le polokalame mo le toe faaleleia o nuu na aafia. O galuega nei sa tele se taimi o le aufaigaluega na faaalu ai, e amata mai i le taeao po seia oo lava i le po. Peitai e tele se aoga o lenei galuega ma lenei aafiaga o le atunuu mo le Matagaluega ona o se avanoa na tofotofoina ai le malamalamaaga o le aufaigaluega i le tele o vaega, pei o le Tulafono mo le Puleaina o Faalavelave Faafuasei Faalenatura faapea le Fuafuaga Aoa mo le Faafoeina o Faalavelave Faafuasei Faalenatura, ma ua maua ai foi ma le avanoa o le Matagaluega e toe asia ai ana tiute faatino i taimi faapenei.

O le fesuiaiga o taitai, sa I ai foi sona aafiaga i galuega faatino a le Matagaluega. O le Ofisa Sili o Pulega talu ai, sa ia tauaveina lenei tulaga talu mai le Fetuunaiga o Matagaluega i le 2004, ma o le fesuiaiga o tofi, o le amataga foi lea o nisi o suiga mo le Matagaluega I le faatinoga ma le faafoeina o ana matafaioi ma tiute. O nei suiga e ui ina sa talia gata e nisi ona ua masani lava i tulaga na sau a'i i le faatinoga o galuega, ae na iu lava ina talia nisi o nei suiga ua matauina o le a siitia ai le lelei o le faatinoga o galuega a le Matagaluega. O se tasi o ia suiga e aofia ai le auala e tuliloaina ai ma ripotiina galuega faatino, ma sa taumafai lava e faatino i se auala e malamalama ai le aufaigaluega i le taua, ma le agaga e faatino ai lenei faiga, e aunoa ma se faamanualia ai o loto ma finagalo ona o lenei suiga. O le faaiuina manuia la o lenei tausaga faaletupe e ala i le ausia o galuega faatino i totonu o taimi faatulagaina, o se ata lea o le tulaga lelei ua faatino ai nei suiga, ma avea o se auala mo le agai i luma, ina ia mautinoa le ausia o taunuuga lelei ma auaunaga sa fuafuaina mo nuu ma afioaga.

O le tausaga la lenei ua amatalia ai le tele o suiga lelei o le a faaauuina e lenei Matagaluega i tausaga o i luma, ina ia mautinoa lona gafa taulimaina o le faatinoina o ana matafaioi ma tiute faaletulafono. E le itiiti le taua, o le amataga foi lenei o le faatinoga e le Matagaluega o ana galuega ma matafaioi na ala ai ona faatuina, e o gatasi ma manaoga o i latou o loo latou tautuaina, ina ia faamaoni le avea o le Matagaluega ma taiulu i le atinaeina o le itu tau agafesootai ma le tamaoaiga o nuu ma afioaga, ma ia o gatasi ma le Taiala mo le Atinae o Samoa.

## **VAEGA 1: MATAFAIOI MA LE VAAIGA TAULAI A LE MATAGALUEGA**

O le Matagaluega o Tina ma Tamaitai Atinae o Nuu ma Afioaga ma Agafesootai o loo taiulu nei i le Vaega mo Nuu ma Afioaga. O ona tiute faaletulafono o le taulamua lea i galuega mo le atinaeina o nuu ma afioaga, ina ia taulau o le faamoemoe loo tulimatai, o le ausia o taunuuga lelei mo aiga, nuu ma afioaga. O le vaaiga taulai pei ona faailoaina i lalo o loo lima taitaiina ai le faatinoina o polokalame ma auaunaga i leni tausaga faaletupe, ina ia o gatasi ma le Taiala mo le Atiane o Samoa 2008-2012.

### **1.1 Vaaiga Taulai**

**“Taimua i le atinaeina o le tamaoaiga ma agafesootai i totonu o nuu ma afioaga”**

### **1.2 Manulauti**

**“Galulue sooso tauau ma paaga totino e ala i pulega lelei, ina ia ausia taunuuga fuafuaina mo le tamaoaiga ma agafesootai o nuu ma afioaga”**

### **1.3 Tulafono**

A o faatalia se tulafono maoti e faafoe ai le Matagaluega o Tina ma Tamaitai Atinae o Nuu ma Afioaga ma Agafesootai, o loo lima taitaiina pea ana galuega faatino e ala i tulafono ua taua:-

- Taiala mo le Atinae o le Tamaoaiga o Samoa (2008-2012)
- Tulafono mo le Matagaluega o Tina ma Tamaitai 1990 ma lona Tulafono Teuteu 1998
- Tulafono mo le Matagaluega o Tupulaga Talavou ma Aganuu 1993, (vaega patino i tupulaga talavou)
- Tulafono mo le Matagaluega o le Lotoifale 1995 ma lona Tulafono Teuteu 1997
- Tulafono mo le Fetuunaiga o Matagaluega 2003
- Feagaiga a Malo Aufaatasi mo le Tafieseaa o Soo Se Ituaiga Faailoga Tagata Faasaga i Tina ma Tamaitai, sainia e le Malo o Samoa i le 1992

- Feagaiga a Malo Afaatasi mo Aia Tatau a le Tamaitiiti, sainia e le Malo o Samoa i le tausaga 1994

## **1.4 Sini Autu**

O Sini Autu a le Matagaluega i lalo o lana Fuafuaga Autasi 2008-2012 e faapea:-

1. Ia i ai Tulafono talafeagai e lima taitaina ai le Matagaluega
2. Faamalosia le atinaeina o faiga faavae, fuafuaga ma le faatinoga o suesuega
3. Saunia ma faatino fuafuaga tuu mamao talafeagai mo le faamalosia o faiga nuu lelei
4. Faamalosia nuu ma afioaga mo le puleaina ma le faatinoina o atinae tau tamaoiga ma agafesootai
5. Uunaia avanoa tutusa mo Alii ma Tamaitai i totonu o faiga faavae, fuafuaga ma atinae mo le faalateleina o filifiliga ma avanoa mo tagata uma
6. Faamalosia malosiaga o le Matagaluega faapea le galulue faatasi, aua le ausiaina o lana Vaaiga Taulai ma le Manulauti
7. Faaauauina le tuuina atu o auaunaga faa lomitusi aupito lelei mo le Malo faapea paaga tumaoti

## **1.5 Matafaioi Autu**

Ina ia ausia ana sini autu, o loo faaauauina pea le faatinoina e le Matagaluega o ana matafaioi ua taua i lalo i totonu o le tausaga faaletupe ua iloiloaina nei:-

1. Faufautua i Faiga Faavae
2. Atinae o Agafesootai
3. Faaauauina o Atinae mo Tamaoiga
4. Faiganuu Lelei
5. Auaunaga Faalomitusi

## **1.6 Talitonuga Faavae ma Taiala e Faatino ai Galuega**

- o Tomai Faapitoa/Taitaiga lelei mo le faatinoina o Galuega
- o Tu ma Aga Faaaloalo
- o Pulega lelei – Manino gaoioiga ma Tali atu i soo se faatinoga
- o Tulaga tutusa talafeagai mo Alii ma Tamaitai
- o Faataua tagata

- Aga Tausili ma Amioga Pulea mo galuega a le Malo

## 1.7 Faatulagaina o le Matagaluega

Afioga Fiamē Naomi Mataafa II

*Minisita o Tina ma Tamaitai Atinae o Nuū ma Afioga ma Agafesootai*

Leituala Kuiniselani Toelupe Tago


Ofisa Sili o Pulega

### VAEGA

O loo tumau pea le Faatulagaina o le Matagaluega i ona Vaega e ono, pei ona iai le Vaega mo le Lotoifale, Vaega mo Tina ma Tamaitai, Vaega mo Tupulaga Talavou, Vaega mo Lomitusi, Vaega mo Suesuega Faiga Faavae Fuafuaga ma Faamaumauga ma le Vaega mo Pulega Faa-Ofisa. E tofu le Vaega ma lona Ofisa Sili Lagolago, i lalo o le Ofisa Sili o Pulega. O loo faailoa atu i lalo Ofisa Sili Lagolago mo vaega taitasi:

|   |   |                             |
|---|---|-----------------------------|
| Vaega mo le Lotoifale                                     | - | Maulolo Leaula Tavita Amosa |
| Vaega mo Tina ma Tamaitai                                 | - | Louisa Apelu                |
| Vaega mo Tupulaga Talavou                                 | - | Taumanupepe Sydney Faasau   |
| Vaega mo Lomitusi   | - | Laulu Sala Tevaga           |
| Vaega mo Suesuega Faiga Faavae Fuafuaga<br>ma Faamaumauga | - | Faasili Afamasaga           |
| Vaega mo Pulega Faa-Ofisa                                 | - | Faauiga Mulitalo            |

O le Vaega o le Pulega o le Matagaluega e aofia ai le Ofisa Sili o Pulega ma Ofisa Sili Lagolago, e nafa ma le puleaina aoao tetele ma le faafoeina o galuega faatino a le Matagaluega.



*Vaega mo le Lotoifale*  
*Vaega mo Tina ma Tamaitai*  
*Vaega mo Tupulaga*  
*Vaega mo Lomitusi*  
*Vaega mo Suesuega Faiga Faavae Fuafuaga ma Faamatalaga Faamaumauina*  
*Vaega mo Manuia Lautele ma Agafesootai - pasia le aloaia e le Komisi o Galuega*

**AUFAIGALUEGA I VAEGA, ITUAIGA, FAAPEA TULAGA ESEESE.**

| VAEGA  | Minisita/ Ofisa Sili o Pulega/ Pule Lagolago |    | Ofisa Sinia Autu |   | Ofisa Sinia |   | Ofisa |   | Ofisa Lagolago |    | Togiaso |   | Aofai o Vaega Taitasi |
|--|--|----|------------------|---|-------------|---|-------|---|----------------|----|---------|---|-----------------------|
|  | A  | T  | A                | T | A           | T | A     | T | A              | T  | A       | T |                       |
| Ofisa o le Minisita                                      |  | ^1 |                  |   |             | 2 | 1     |   |                |    |         |   | 4                     |
| Ofisa o le Ofisa Sili o Pulega                           |  | *1 | 1                |   |             | 1 |       |   | 1              |    |         |   | 4                     |
| Vaega mo Auaunaga Lautele                                |  | "1 | 2                |   |             | 1 | 1     | 1 | 1              | 11 | 9       | 1 | 28                    |
| Vaega mo Lomitusi  | "1   |    | 1                |   | 3           | 1 | 14    |   | 4              | 3  | 1       |   | 28                    |
| Vaega mo Lotoifale                                       | "1   |    | 2                |   | 1           | 2 | 2     | 1 | 2              |    | 2       |   | 13                    |
| Vaega mo Tina ma Tamaitai                                |  | "1 | 1                | 1 | 3           | 3 | 2     | 4 |                | 3  |         |   | 18                    |
| Vaega mo Tupulaga Talavou                                | "1   |    | 1                |   | 1           |   | 1     | 2 |                |    |         |   | 6                     |
| Vaega mo Suesuega, Faiga Faavae ma Faamaumauga Iloiloina |  | "1 | 1                |   | 2           | 2 |       | 3 | 2              | 1  |         |   | 12                    |
| AOFAI  |  |    |                  |   |             |   |       |   |                |    |         |   |                       |
| <b>AOFAI O ALII</b>                                      |  |    |                  |   | <b>65</b>   |   |       |   |                |    |         |   |                       |
| <b>AOFAI O TAMAITAI</b>                                  |  |    |                  |   | <b>48</b>   |   |       |   |                |    |         |   |                       |

A: Alii, T: Tamaitai, ^Minisita, \*Ofisa Sili o Pulega, "Pule Lagolago

## VAEGA 2: TULAGA MA GALUEGA UA AUSIA 2009/2010

### 2.1 Fautuaga i Faiga Faavae ma Atinae Fuafuaina

O le tuuina atu o fautuaga faa faiga faavae i le Minisita, o se tasi lea o matafaioi atu a Matagaluega a le Malo e aofia ai le Matagaluega lenei, aua o le fesootaiga lea ma le Kapeneta e ala i le tuuina atu o fautuaga i mataupu ma faafitauli tau i le atinae e patino iai galuega a le Matagaluega. O le Ata Faataitai o le Fuafuaga mo le Vaega mo Nuu ma Afioga, o se tasi o taiala i lona tulaga aoao tetele, na toe asia ina ia faamautinoa ma faamanino vaega mo le atinaeina o nuu ma Afioga, ina ia o gatasi ma le Taiala mo le Atinae o Samoa 2008-2012. Sa lima taitaiina lava le toe asiaina o le Fuafuaga mo le Vaega mo Nuu ma Afioga i le Taiala mo le Atinae o Samoa. I le taua ai o lea vaega, ua iai nei le Ata Faataitai o le Fuafuaga mo le Vaega o Nuu ma Afioga i lona tulaga pei ona toe asia ai ma le faamoemoe o lenei galuega o le a faamaeaina i totonu o le kuata muamua o le tausaga faaletupe o lumanai.

#### Pepa o Faamatalaga mo le Minisita

O le faamoemoe o le tuuina atu o pepa o faamatalaga mo le Minisita, e faailoa atu ai mo lona silafia mai lea taimi i lea taimi, le faagasologa o galuega faatino a le Matagaluega; e le gata i lea o le tuuina atu o faamatalaga faapitoa ma fautuaga talafeagai ina ia faavae ai sona finagalo i mataupu e faasino i matafaioi faaletulafono o loo tuliloaina e le Matagaluega.

Mo le tausaga faaletupe lenei (talu mai Novema 2009) o Pepa mo le Minisita na faaauuala atu e ala i ripoti, tapenaina o saunoaga faa-Minisita ma tusitusiga, fonotaga fesilafai aemaise o ripoti o malaga faale Malo sa faataunuuina mo le aufaigaluega o le Matagaluega aua le atinaeina o latou tomai ma agavaa. O ia pepa mo le Minisita e le gata sa faailoa atu ai mo lona silafia galuega a le Matagaluega ae o se avanoa foi lea e tuuina mai ai le lagolago faapitoa ma fautuaga faa taitai mo le faafoeina o galuega a le Matagaluega.

#### Suiga tau Tulafono

Na pasia ai e le Palemene i le tausaga faaletupe lenei le Tulafono Teuteu mo le Matagaluega o Tina ma Tamaitai 2009, ma ua faatulafonoina ai le tofiga o “*Sui Tamaitai o le Nuu*” i lalo o le faamaoniga a le Kapeneta. O se matatia lenei ua ausia mo le galuega o loo faia aua le faaalualuina pea i luma o le atinae o tina ma tamaitai i Samoa, aua o lea ua faatulafonoina le tofiaina o Sui Tamaitai o le Nuu pei ona filifilia ai e Komiti a Tina ma Tamaitai o nuu. O nei tofiga na amata aloaia i le 2004 i lalo o le Faaiuga a le Kapeneta, a o lea ua pasia le tulafono toe teuteu e saga aloaia ai ina ua mavae tausaga e ono, ma ua saga faamautuina ai le faatauaina o nei tofiga mo le atinaeina o nuu ma afioga.

O le amataga o le 2010 na pasia ai foi e le Palemene le Tulafono toe Teuteu mo le Matagaluega o le Lotoifale, ma ua faatulafonoina ai le suia o le tofiga “*Pulenuu*” i le “*Sui o le*

*Nuu*". O lenei suiga ua faailoa atili ai o i latou o loo umia nei tofiga ua na o i latou o sui o nuu ma afioaga e fai ma sooupu e fesootai ai le pulega a alii ma faipule ma le Malo, e ala i le Matagaluega o Tina ma Tamaitai Atinae o Nuu ma Afioaga ma Agafesootai. O le a umi se taimi e tuuina atu e tau faamasani ai le lautele o le atunuu i lenei suiga aua ua masani lava i le faaaogaina o le upu "Pulenuu" i le tele o tausaga, ae taua le faamauina o suiga nei faaletulafono aua o le Matagaluega o Tina ma Tamaitai Atinae o Nuu ma Afioaga ua iai le tiute faaletulafono e faalauiloa ai nei suiga mo le mamalu lautele o le atunuu faapea nuu ma afioaga.

### **Fesoasoani i Tomai Faapitoa mai le Faufautua Faapitoa i Faiga Faavae**

O le tausaga foi lenei na faamanuiaina ai le Matagaluega o Tina ma Tamaitai Atinae o Nuu ma Afioaga ma Agafesootai e ala i le fesoasoani faa tomai faapitoa mai le tamaitai o Vanessa Barlow Schuster, ua avea nei ma Faufautua Faapitoa a le Matagaluega i mataupu tau faiga faavae. O le tamaitai o Vanessa Barlow Schuster e sau mai le Matagaluega o Mataupu tau Atumotu o le Pasefika a le Malo o Niu Sila, ma o loo faigaluega nei o ia i lalo o le Feagaiga Faa Uo a le Malo o Samoa ma le Malo o Niu Sila. O le galuega a le Faufautua Faapitoa i lenei tausaga ua fesoasani tele i le tuufaatasiina o le *Auivi mo le Ausia o Taunuuga Lelei* a le Matagaluega, o le Ata Faataitai o le *Fuafuaga Alualu Mamao* a le Matagaluega faapea le Ata Faataitai o le *Fuafuaga o le Vaega mo Nuu ma Afioaga*. O le Ata Faataitai o le *Auivi mo le Ausia o Taunuuga Lelei* faapea le Ata Faataitai o le *Fuafuaga Alualu Mamao* a le Matagaluega, o le a faamautuina pe a amatatia le galuega o le Polokalame mo le Toe Fuataiina o le Matagaluega i le tausaga faaletupe fou.

### **Ata Faataitai o le Auivi mo le Ausia o Taunuuga Lelei**

O le *Auivi mo le Ausia o Taunuuga Lelei*, o se taiala o le a faaaogaina e le Matagaluega e faamautu ai vaega e ave iai lana faamamafa. O le a fesoasoani e tuliloa ai ma mataitu ni fesuiaiga o mataupu ma faafitauli e tulai mai mo le Matagaluega, ma o le a fesoasoani foi e faailoa mai ai poo tali atu le Matagaluega i manaoga o tagata ma vaega eseese o loo ia tautuaina. O le a mafai ai ona maua finagalo fesootai lelei mo taunuuga lelei e moomia mo nuu ma afioaga aua o le a mafai ai ona tuliloa le faagasologa o atinae mo nuu ma afioaga mai lea taimi i lea taimi, i se auala gatasitasi ma le mautu, pe a fuaina i le tele o taunuuga lelei mo nuu ma afioaga ua ave iai le lagolago a lo tatou Malo. O le a fesoasoani tele foi le faia o suesuega maoti faapitoa i mataupu o loo aafia ai nuu ma afioaga ma o le a mafai ai ona tapena fuafuaga ma faiga faavae talafeagai e moomia.

### **Ata Faataitai o le Fuafuaga mo Nuu ma Afioaga**

Sa toe asia i le tausaga lenei le Ata Faataitai o le Fuafuaga mo le Vaega o Nuu ma Afioaga ina ia mafai ona toe faamaoti le vaega tonu e agai iai le atinaeina o nuu ma afioaga, ina ia o gatasi ma vaega o le Taiala mo le Atinae o Samoa. O le fesoasoani a le Tamaitai Faufautua Faapitoa i Faiga Faavae a le Matagaluega na toe faaatoatoaina ai le tuufaatasiina o lenei galuega. Talu ai o le Fuafuaga muamua lenei mo le Vaega o Nuu ma Afioaga, o le ala lea o le tele o luitau sa feagai ai ma le Matagaluega, i le tau faamautuina ma le faamatalaina o le lautele o vaega e aofia i totonu o lenei Vaega. Ua maea le galuega sa faatino mo le toe asia o lenei galuega ma o le a faatino faatalanoaga ma le Komiti Faafoe o le Vaega i luga o le ata

faataitai ua iai pe a amatalia le tausaga faaletupe fou, ina ia mafai loa ona amata faatino lenei Fuafuaga.

### **Faiga Faavae Aoa mo Tupulaga Talavou o Samoa**

Ina ia o gatasi ma le Iloiloga o le Faiga Faavae Aoa mo Tupulaga Talavou 2001-2010, ua amata tapenaina nei le Faiga Faavae fou. O le Vaega o Suesuega Faiga Faavae ma Fuafuaga faapea le Vaega mo Tupulaga Talavou faatasi ma le fesoasoani a le Faufautua Faapitoa i Faiga Faavae na amatalia se vaega o lenei galuega i le tausaga faaletupe lenei. O loo faamoemoe o le tapenaina o lenei Faiga Faavae fou o le a faaogaina ai le tele o fautuaga sa tuuina mai i le Ripoti o le Iloiloga o le Faiga Faavae faapea le Polokalame o le TALAVOU ina ia mautinoa o loo tali atu i manaoga o tupulaga talavou o Samoa.

### **Komiti Faa-Palemene mo le Uunaia o le Soifua Maloloina**

O le auai ai o le Afioga i le Minisita ma le Ofisa Sili o Pulega i lenei Komiti Faa-Palemene fou ua faatuina e uunaia le Soifua maloloina, o se laasaga taua lea e saga faamalosi ai le Polokalame mo Aiga ma Nuū Manuia faapea le uunaia o le auai o nuu ma afioaga e galulue faatasi, ma avea ma o latou tiute tauave le uunaia o le soifua maloloina. I le avea ai o le Matagaluega lenei ma taiulu mo vaega eseese o le atunuu lautele, o le ave o le faamuamua i le soifua manuia ma le maloloina o tina ma tamaitai, tupulaga talavou ma tamaiti, o se faailoga mautu lea o le faaauauina o le atinae manuia o nuu ma afioaga i tulaga tau agafesootai ma le tamaoaiga. A soifua maloloina lelei le tagata e soifua maloloina aiga, a soifua maloloina aiga, o le a soifua maloloina foi nuu ma afioaga, ae a le soifua maloloina nuu ma afioaga, o le a faigata foi taitaiina e i latou ma ausia le faaauauina o galuega atinae mo le manuia o nuu ma afioaga i tulaga tau agafesootai ma le tamaoaiga. Sa ave le faamuamua a lenei Komiti i le tausaga faaletupe lenei i le faamautuina o nisi vaega e aofia ai galuega a se komiti e taitaiina e Sui o le Palemene, latou te faalauiloaina lenei mataupu, e le gata i lea a o le faagaioiina o talosaga mo fesoasoani tau tupe e faatino ai se Polokalame o Galuega Faatino a lenei Vaega.

## **2.2 Faiga Nuū Lelei ma Pulega**

O loo faaauauina pea le galuega a le Matagaluega i le uunaia o faiga nuu lelei ma pulega, e ala i le fesootaiga ma Sui o le Nuū (*sa taua muamua o Pulenuu*) ma Sui Tamaitai o le Nuū. O le fesootaiga tuu sao a le Matagaluega ma saofaiga a nuu ma afioaga, e tauala atu i Sui o le Nuū ma Sui Tamaitai o le Nuū, o se malosia o loo faaauauina pea ona faaoga e le Matagaluega e faa faigofie ai ona maua mai le lagolago a nuu ma afioaga i ana polokalame ma auaunaga, faapea le auai o tagata o le nuu i polokalame o loo faatino i totonu o nuu. O nuu ma afioaga e le o ni nuu mavae, o loo faaogaina le fesootaiga ma taitai o ekalesia, o lea e faatauina ai foi le taitaiga a le vaega o le ekalesia i nuu ma afioaga.

### **Galuega ma Sui o le Nuū ma Sui Tamaitai o le Nuū**

O le galuega mo le faamalosi ma le uunaia o tomai ma agavaa o Sui o le Nuū faapea Sui Tamaitai o le Nuū, o se tasi o vaega o loo faaauauina pea ma ave iai le faamuamua a le

Matagaluega. Mai le ripoti a le Vaega mo le Lotoifale, e 12 aoaoga faamasani sa faatinoina mo Sui fou o le Nu'u, ae 27 mai le 40 o aoaoga sa fuafuaina na faatinoina mo Sui o le Nu'u uma i le tausaga lenei. O aoaoga faamasani mo Sui o le Nu'u fou, e faamanino atili ai mo lo latou silafia tiute ma matafaioi o le Matagaluega, ma tulaga e moomia ai la latou lagolago e e ala i a latou matafaioi, galuega faatino ma tiute.

Mo Sui Tamaitai o le Nu'u, sa faaauuina pea le faalateleina o lo latou malamalamaaga i galuega a le Matagaluega faapea galuega faatino a isi Vaega o loo moomia ai la latou lagolago. O tulaga ia sa faaopoopo atu i a latou aoaoga sa faatinoina e faamalalama ai o latou tiute ma matafaioi ma le auala e tuliloaina ai, ina ia mautinoa o loo silafia e Sui Tamaitai o le Nu'u o latou tiute faaletulafono ina ua filifilia i latou i nei tofiga ma faamaonia e le Kapeneta.

E eseese taimi ma aso o fonotaga faalemasina a Sui o le Nu'u ma Sui Tamaitai o le Nu'u mo Upolu ma Savaii, sa faatinoina i le tausaga faaletupe lenei. O se tasi lea o vaega o le *Polokalame mo le Faafaoeina o le Faatinoga o Galuega* o loo faaogaina e le Matagaluega e tuliloa ai ma mataitu le faatinoga o auunaga a Sui o le Nu'u ma Sui Tamaitai o le Nu'u, ina ia o gatasi ma o latou tiute faatulagaina.

### **Galuega mo le Auala e Faatino ai Pulega Lelei i Nu'u ma Afioaga**

O le tapenaina o le *Auala e Faatino ai Pulega Lelei i Nu'u ma Afioaga*, na faatinoina i le tausaga faaletupe lenei, e ala i le faafaigaluegaina o se Fauautua Faapitoa Samoa, na te taitaiina lenei galuega faapea faatalatalanoaga ma vaega eseese, faapea le aoina o faamatalaga moomia. O loo faamaopoopoina lenei galuega e le Vaega mo le Lotoifale, ma o loo ave le faamamafa i le faamalositia o pulega a alii ma faipule, ma lagolagoina le faamalositia o saofaiga i totonu o le nuu, ina ia mautinoa le faaauuina o atinae lelei e amata mea ai lava le nuu latou. A o faatalia le faamaeaina o le ripoti o lenei galuega, o le faamoemoe o lenei *Auala e Faatino ai Pulega Lelei i Nu'u ma Afioaga*, o le a maua ai se faasino ala i le auala e galulue vavalalata ai le Malo ma pulega I totonu o nuu ma afioaga, e tauala atu i le Matagaluega o Tina ma Tamaitai Atinae o Nu'u ma Afioaga ma Agafesootai.

### **Tusi o Faamaumauga o Nu'u ma Afioaga**

O le galuega mo le toe faafouina o faamatalaga o le Tusi o Faamaumauga o Nu'u ma Afioaga o se tasi o galuega tuua a le Matagaluega sa toe faaauuina i le tausaga faaletupe lenei. O le Vaega o Suesuega Faiga Faavae ma Fuafuaga o loo taulamua i lenei galuega, ma o lenei Tusi o loo maua uma ai faamatalaga o nuu ma afioaga taitasi i o latou faamaumauga faafuainumera, ma nisi o faamaumauga faa-agafesootai. Sa toe iloiloina lenei Tusi o Faamaumauga ina ua iai nisi faamatalaga taua ua manatu le Matagaluega e tataua ona toe faaopoopo, ina ia avea ma Tusi o Faamaumauga e faaogaina tele e le gata o le Matagaluega, a o isi Vaega ma paaga faale atinae, mo le tapenaina o faiga faavae, atinae ma fuafuaga faataatitia. O le a avea foi ma faavae o le a fautuaina ai le avea o le Matagaluega ma tapuvae tasi o faamaumauga mo nuu ma afioaga, pei ona avea ai o ia ma taiulu mo le Vaega o Nu'u ma Afioaga. I le agaga lava lea e tasi, o se Tusi o Faamaumauga e mafai e taitai o nuu ma afioaga ona faaoga e tuliloa ai ma mataitu le faagasologa o galuega atinae a le nuu lava ia, ina ia mafai ona latou molimauina mai ni suiga o le soifua o tagata o nuu, e

ala i polokalame ma auaunaga o loo faatinoina mo nuu ma afioaga, ma faapena ona tuuina mai ia ripoti i le Malo ma ana paaga, aua le tapenaina ma le fuafuaina o polokalame faatino ma auaunaga.

### **2.3 Faamalositia Nu'u ma Afioaga e Faafae ma Faatino** **Polokalame mo le Atinae o Agafesootai ma le Tamaoaiga**

O le faamoemoe mo le faamalositia o nuu ma afioaga e faafae ma faatino galuega atinae i mataupu tau agafesootai ma le tamaoaiga, e faavae mai i se tasi o taiala e faaaogaina ai "Malosiaga o loo i Totonu o Nu'u ma Afioaga". E iai le talitonuga o le Matagaluega o Tina ma Tamaitai Atinae o Nu'u ma Afioaga ma Agafesootai, e le mafai ona faaaauina ma tulaga lelei se polokalame e aunoa ma le faamamafaina o le, auai atoatoa o nuu ma afioaga, faatinoina e nuu ma afioaga ae sili ona taua le faateleina o lo latou malosiaga e faaaau ona faafae se polokalame. I totonu o le tolu tausaga muamua talu ona faavaeina le Matagaluega leni, sa faatinoina lava polokalame ma auaunaga i lona tulaga masani. O le faamalositia o nuu ma afioaga sa avea o se tulaga ua maea ona ausia ona o le malosi o la tatou aganuu ma saofaiga faaleaganuu i totonu o nuu. O le taunuuga ua oo iai, o le aliali mai lea o le agaga o le ola faalagolago i o tatou tagata, ma ua manatu ai le Matagaluega i le tuliloaina o lana matafaioi taiulu mo nuu ma afioaga, ua tataua ona toe liliuina leni talitonuga e ala i le faamamafaina ma le uunaia o nuu ma afioaga latou te taitaiina ma faamautuina le ausia o taunuuga lelei mo le atinae manuia tau agafesootai ma le tamaoaiga I totonu o latou nuu, faatasi ma le lagolago atu a le Malo ma ana paaga mo le atinae.

#### **Faalauiloaina o le Polokalame o le Ie Samoa**

O le lalagaina o le Ie Samoa ma le Polokalame mo le gaosiina o le Siapo sa faaaauina pea e oo mai i leni aso, ma ua latalata i le 200 le aofai o 'fale lalaga' ua resitalaina mo Upolu, Savaii, Apolima ma Manono. O leni polokalame o loo faafaeina e le Matagaluega i lalo o le taitaiga a le Komiti Faafae o loo taitaifono ai le Afioaga i le Palemia, ma o loo faatinoina e ala i Sui Tamaitai o le Nu'u, Komiti a Tina ma Tamaitai ma faalapotopotoga filifilia a mafutaga a tina o ekalesia. O asiasiga e tuliloa ai fale lalaga sa faatino lava e sui o le Komiti Faafae, ma o le tausaga faaletupe leni, sa faatino ai ma le fesoasoani faapitoa faa matuauu mo tina ma tamaitai ma a latou falelalaga. O taumafaiga mo le faaleleia o faamaumauga ma fuainumera faamauina o le polokalame, sa faatinoina foi i le taimi o asiasiga ma ua iai nei faamaumauga e mafai ona faaaogaina, e faailoa ai le tulaga o agai iai le polokalame, e ala i numera o ie ua lalagaina, ma le ituaiga lelei ua ausia i ie ua lalagaina. O le a maua ai foi le avanoa e saga faaleleia atili ai le polokalame, ma faamautinoa le iai pea o le lagolago mo tina ma tamaitai o loo auai i leni polokalame a le atunuu.

#### **Auala Galue ma le Maua o Taumafa**

O le uunaia o le iai o le mau i le atunuu e ala i taumafa, o se tasi lea o vaega autu o loo faailoa mai i le Taiala mo le Atinae o Samoa, i lalo o le Vaega o Nu'u ma Afioaga. O le ala lea sa fesoasoani ai le Matagaluega e auala atu i le Vaega mo le Lotoifale i le sefulu lua masina talu ai, i le faatinoina o asiasiga o auala galue. O asiasiga sa faatino i le 12 masina

talū ai sa maitauina ai le faatupulaia o le numera o faatoaga i totonu o nuu sa asia. O le tulaga lea e faailoa mai ai le fesootaiga lelei o le uunaia o le mau o taumafa, ma le lelei o auala galue, aua ua faafaigofie ai mo tagata le galuegaina o latou fanua mo faatoaga. O le uunaia o le atinaeina o faatoaga ina ia maua taumafa, sa faaauauina pea e ala i fonotaga a Sui o le Nuū faapea le galuega a le Komiti o Sui o le Nuū faapea asiasiga sa taitaiina e le Sui o le Nuū i totonu o afioaga.

### **Faamamaavega ma le Komiti o le Faleula**

Sa faaauaina pea i le tausaga lenēi le polokalame faaleaoaoga faalauiloa i luga o ala ea, le *Polokalame mo le Faamama Avega* a le Komiti o le Faleula. O loo afifi i totonu o le polokalame lenēi le faamoemoe ina ia amanaia suiga o le tamaoiga, ma le siitia o le tau o le soifuaga, ina ia faia ni fetuunaiga ma fesuaiga talafeagai i le faatinoina o o tatou tiute faaosi aiga, i se tulaga faamama avega. O se tasi lea o taumafaiga e uunaia ai malosiaga o nuu ma afioaga e faafoe ai ma faatino polokalame mo le atinaeina o agafesootai ma le tamaoiga e mafai ona faaauauina, ma e e faavae i luga o tatou tu ma agaifanua sa aoaoina e tuua ua mavae ina ia mafai ai e o tatou aiga ma nuu ona soifua i totonu o le saosaoa o suiga faaletamaoiga o le lalolagi pei ona aafia ai ma Samoa.

I lalo o le taitaiga a le Vaega mo le Lotoifale, o le faamoemoe o le “Faamama Avega” e fesootai lelei ma le polokalame mo *Faiga Nuū Lelei ma Pulega* pei ona faasino tonu i taitai o nuu aemaise matai o aiga, aua o i latou o loo i le saofaiga, e mafai ai ona faia ni suiga pei ona taumafai atu iai le Komiti o le Faleula.

### **Polokalame o le Aiga ma Nuū Manuia**

O le Polokalame o le Aiga ma Nuū Manuia o se taumafaiga mai le Matagaluega o Tina ma Tamaitai Atinae o Nuū ma Afioaga ma Agafesootai e faamalosiā puipuiga faa-agafesootai e ala i le faaleleia o le siosiomaga o fesootaiga, faapea le siosiomaga o maota ma laoa i totonu o nuu ma afioaga, ina ia o gatasi ma vaega o le polokalame pei ona taua I lalo:

- Fale mama ma le saogalemu
- Umukuma mama ma saogalemu
- Fale le taua mama ma saogalemu
- Togalaau aina a aiga
- Siosiomaga mama ma saogalemu e ala i le iai o loiloi mo meaituaolo
- Mauaina o vai taumafa mama ma saogalemu
- Aiga e saoloto mai le ulaula tapaa

O le tausaga 1999 na amata mai ai lenēi Polokalame, o se vaega o le Polokalame ua faaigoaina “*Atumotu Soifua Maloloina*” pei ona iai le vaaiga taulai a *Minisita o le Soifua Maloloina* i lena vaiata. O se polokalame o loo o gatasi ma le *Fuafuaga mo le Vaega o le Soifua Maloloina 2008-2018*, ma sa faaauauina e oo mai i le aso e le Matagaluega o Tina ma Tamaitai Atinae o Nuū ma Afioaga ma Agafesootai lenēi polokalame, e ala i le fesootaiga ma Sui Tamaitai o le Nuū, o i latou ua iai le faamaoniga a le Kapeneta.

O le faatinoina o le Polokalame o le Aiga ma Nuū Manuia o loo faaauauina pea i lalo o le Vaega mo Tina ma Tamaitai. Ao faaauauina pea le faatinoina o le ANM, sa faailoa mai i le

tuliloaina o *Galuega Faatino a Sui Tamaitai o le Nuu* i le 12 masina talu ai, o loo iai pea luitau i le taumafaiga o le vaega o togalaau aina. E iai nisi o vaega ua mafua ai lea tulaga, muamua o le leai o ni fatu toto, lua, o loo filifili pea tagata e faatau mai latou fualaaui aina i le maketi na i lo le totoina o ni latou togalaau, ma leisi o manatu ma uiga faaletagata faatasi ai ma le aga masani a tagata e le fiafia e taumafa fualaaui aina. Sa faaaui pea taumafaiga e uunaia lenei vaega e ala i le fesoasoani faapitoa mai le Matagaluega o Faatoaga ma Faigafava e ala i le faia o faataitaiga i le totoina o laau aina faapea le mauaina mai o fatu toto pei ona iai i taimi ua tuanai.

O leisi vaega o le polokalame e aofia ai le uunaia o *Aiga Saoloto mai le Taumafa Tapa*, ma o se tasi foi lenei luitau ona o loo faaauiina pea le ulaula o tagata i totonu o latou fale. O loo faamalosi foi e auala atu i le Komiti Galue o polokalame le taumafaiga a le Matagaluega o le Soifua Maloloina, ina ia momoli pea le feau e ala i polokalame faalauiloa ma aoaga mo nuu ma afioaga, i aafiaga o lo latou soifua maloloina ona o le ulaula tapaa.

O le amataga o lenei polokalame i le 1999, sa faataitai muamua i nuu e ono, ae o le taimi nei i le mavae ai o le sefulu tausaga talu ona faavaeina, ua 180 le aofai o nuu ua auai, ma o loo faatupeina uma lenei polokalame i lalo o le Tala a le Tupe a le Malo. O le tausaga faaletupe lenei ua atoa iai le sefulu tausaga o le Polokalame o le ANM ma o se matatia ua alaga tataui ona faailoaina i totonu o lenei ripoti. E ui sa faatauva lona amataga mai, ae ua faaauiina mai lenei polokalame, ma ua avea ma polokalame e faaaui atu ai polokalame mo le soifua manuia lautele, ma ua faaaogaina o se auala lelei e mafai ona auai ai nuu ma afioaga i le uunaia o tulaga tau soifua maloloina, pe a fua i le vaega faale atinae mo nuu ma afioaga. O le taimi nei, ua faagaioiina pea e nuu ma afioaga lenei polokalame, i lalo o le taitaiga a Sui Tamaitai o le Nuu ma Sui o le Nuu; a e i lona tulaga aoao tetele, o loo toe faamalosi atili le galuega a le Matagaluega o Tina ma Tamaitai Atinae o Nuu ma Afioaga ma Agafesootai, e ala i le faamaopoopoina o ana paaga galulue mo le tuliloaina o le faatinoina o a latou matafaioi i totonu o nuu ma afioaga.

### **Polokalame mo le Faatupeina o Pisinisi Laiti**

O le Vaega mo Tina ma Tamaitai o loo nafa ma le faatinoina o le polokalame lenei a le *Faletupe Atinae o Asia* faatasi ma le galulue soosootauu ma le Faletupe o Atinae a Samoa. O loo agai tonu lenei polokalame e lagolagoina atinae laiti faa-pisinisi a tina ma tamaitai, e ala i le faatinoina o aoaga i mataupu tau pisinisi, ma le faatinoina o nonogatupe e faaaogaina ai le Metotia ua taua o le *Grameem Model* poo le faaaogaina o vaega latou te uunaia le faatinoga. Ua siitia le numera o tina ma tamaitai ua auai i lenei polokalame, ma ua faailoa mai i asiasiga sa faatino e tuliloa ai lenei polokalame mo le tausaga lenei, ua silia i le 800 tina ma tamaitai ua mauaina nonogatupe, ma e 515 tina ma tamaitai ua iai latou poloketi faapisinisi. Mai lea tuuaofaiga, e 47 pasene tina ma tamaitai Upolu, ae 86 pasene tina ma tamaitai o Savaii ua iai pisinisi.

Ua faailoa mai i pasene ua taua le siitia o pasene mo Savaii, e iloa ai le sologa lelei o le polokalame mo tina ma tamaitai Savaii na i lo Upolu. Ua maitauina pea e ala i faamaumauga le tulai mai o lea eseese o pasene ma faatinoga o polokalame i Upolu ma Savaii. Ina ua faatino le Iloiloga a le Matagaluega, sa faia ai le faaiuga ina ia faatino se

suesuega e sailia ai mafuaaga o lenei eseesege, ma faailoa mai ni auala e foia ai lenei faafitauli, aua e iai ona aafiaga i le galuega faatino a le Matagaluega.

I lona aotelega, o loo matua talisapaia le faatinoina o lenei polokalame, ina ia maua ai e tina ma tamaitai le fesoasoani o loo matou moomia. Sa faia foi se tasi o faaiuga i le Iloiloga a le Matagaluega, o se tasi o fesoasoani e mafai ona tuuina atu e le Vaega o Tina ma Tamaitai, o le faatinoina lea o aoaoga ma tuuina atu le lagolago talafeagai i le tapueina o tomai faapisinisi o tina ma tamaitai o nuu ma afioaga o loo aafia i lenei polokalame. Ua iai nisi o le afaigaluega ua maua tusipasi taualua e avea ai ma faiaoga o mataupu tau pisinisi, i lalo o le polokalame ua taua o le *Amataina o Lau Pisinisi* faatupeina e le *Faalapotopotoga o Leipa Faavaomalo*, ma ua iai lo latou tomai ma agavaa e lagolago ai i le faatinoina o le polokalame mo pisinisi laiti a tina ma tamaitai. E iai le talitonuga, o lenei fesoasoani lagolago a le Matagaluega o le a faaleleia atili ai ma faaauauina e tina ma tamaitai a latou lava pisinisi laiti, ma o le a faateleina lo latou tomai ma agavaa i le faatinoina o ia pisinisi mo le atinae o agafesootai ma le tamaoaiga.

### **Atinaeina o Tupulaga Talavou**

O le faatinoina o le Faiga Faavae Aoa mo Tupulaga Talavou o Samoa 2001-2011 e ala i le Polokalame o le TALAVOU, o le auala lea na faagaoioi ai le galuega a le Matagaluega mo le atinaeina o tupulaga talavou i totonu o lenei tausaga. O vaega sa agai iai galuega faatino e aofia ai Atinae e taulamua ai lava tupulaga talavou latou i le itu tau tamaoaiga; Uunaia o aga tausili faaletagata ma polokalame mo le aoaoina o tulaga tatau o le soifuaga; Soifua maloloina i tulaga tau feusuaiga ma le fanauina o tamaiti; faapea tupulaga talavou ma le avea ma taitai. E iai polokalame aoa tetele sa faamaopoopoina ma faatinoina e le Vaega mo Tupulaga Talavou (silasila i pepa faaopoopo o loo faapipii atu). O le faamoemoe autu o nei polokalame o le siitia o le malamalamaaga o tupulaga talavou ma faalateleina o latou tomai ma agavaa e latou te tofua sao ai i le atinaeina o le tamaoaiga ma agafesootai ma faapena foi ona maua e i latou faamauniaga o ia atinae.

I le faagasologa o galuega patino i le Polokalame o le TALAVOU, ua toe faamaonia e le UNDP le toe faaauauina o le polokalame mo leisi lua tausaga i lumanai. E lua vaega tetele o le a agai iai le faatinoga o le polokalame i leisi lua tausaga, o le Faamalositia o Faiga Faavae mo Tupulaga Talavou ma le Atinaeina o le Tamaoaiga mo tupulaga talavou. O le auala lea o le a fesoasoani ai i le Vaega mo Tupulaga Talavou e toe fetuunai lana galuega mo tupulaga talavou ina ia faafaigofieina le ausiaina o taunuuga mo tupulaga talavou i le itu tau agafesootai ma le tamaoaiga, ma ia o gatasi ma le atinaeina o le faiga faavae fou mo tupulaga talavou lea ua amatalia lona tapenaina.

O loo taua i lalo nisi o galuega faatino i totonu o le tausaga faaletupe lenei. O le faamoemoe o nei galuega o le tapenaina lea o tupulaga talavou ina ia latou gafataulimaina le taitaiga o atinae mo agafesootai ma le tamaoaiga i soo se vaega. O tupulaga talavou o taitai ia o le atunuu i le lumanai ma afai o le a le faatauaina lo latou atinae, o le a le mautinoa foi le faaauauina o galuega atinae o loo faatinoina i le taimi nei mo Samoa i le lumanai.

## **Vaiaso mo Tupulaga Talavou**

O le Vaiaso mo Tupulaga Talavou e faatinoina i tausaga taitasi i lalo o le taitaiga a le Vaega mo Tupulaga Talavou. O le avanoa lea e faatalanoa ai mataupu ma faafitauli o feagai ma tupulaga talavou, faalauiloa ai le sosia ma le atamai o loo faaaupegaina ai tupulaga talavou latou te taitaiina ai le faatinoina o atinae aemaise o le avea o i latou ma taitai o Samoa i le lumanai. O se avanoa foi lea mo le Vaega o Tupulaga Talavou e saga faamalosia ai fesootaiga ma ana paaga galulue i le atinaeina o tupulaga talavou i Samoa. Sa amatalia le polokalame i se sauniga lotu sa faasalalauina i le televise i le afiafi o le Aso Sa, ma faaauuina ai ona polokalame fuafuaina e aofia ai le Palemene Faataitai mo Tupulaga Talavou faapea taaloga faia faa tauvaga.

## **Palemene Faataitai mo Tupulaga Talavou**

O le Palemene Faataitai mo Tupulaga Talavou o se fonotaga faa-palemene e faataitai ai ma aoaoina tomai ma agavaa o tupulaga latou te faataitai ai ona avea ma sui o le Palemene e faatalanoaina mataupu ma faafitauli o loo aafia ai tupulaga. O le mataupu autu sa faatalanoaina i lenei tausaga e le Palemene Faataitai o le *“Fesuiiaiga ma le toe fesiitaiga o nofoaga e nonofo ai tagata ma aiga na aafia i le Galulolo”*. O nofoa e 49 o le Palemene na tofia iai le 21 mai Savaii ae 26 mai Upolu ma le toalua o Palota Tutoatasi. O sui e 2 o Palota Tutoatasi na tuuina atu i sui o le Faalapotopotoga o le Nuanua o le Alofa, o le faalapotopotoga faapitoa mo i latou e iai manaoga faapitoa. O se tasi o taualumaga o lenei palemene o le asiasiga na alu i nofoaga na aafia i le galulolo i le atu Aleipata. I le sauniga e tapunia ai le Vaiaso o Tupulaga Talavou, na saunoa ai le Afioga i le Minisita e uunaia tupulaga talavou na auai i le Palemene Faataitai, e faataua i o latou manatu ma tapenaina i latou mo le agai i luma, ina ia avea ma taitai lelei o le lumanai. Sa toe faamautuina atili e le Afioga i le Minisita lona lagolagoina o atinae mo tupulaga talavou ma le taua o le amata faamasani o i latou a o laiti e talanoa i mataupu ma faafitauli, aua o i latou o lea avea ma taitai o Samoa i tausaga a sau. O loo maua le ata faatifaga na pueina e maimoa ai i taualumaga o le Palemene Faataitai.

## **Tupulaga Talavou ma Taaloga**

O loo faaauuina pea ona faamaopoopoina ma lagolagoina e le Vaega mo Tupulaga Talavou le faatinoga o taaloga mo tupulaga talavou. E le gata ina fesoaosani e atinae ai ma uunaia tupulaga e faataua a latou taleni i taaloga, ae o se sao taua foi lea mo le uunaia o le soifua maloloina e ala i taaloga. O le Polokalame mo le Vaiaso o Tupulaga Talavou na aofia ai taaloga pei o le soka, kirikiti faapalagi ma le Judo. O taaloga o le kirikiti faapalagi ma judo e le lavea I le lisi o taaloga faa Samoa peitai o le tausaga lenei na iloa ai le toatele o tupulaga talavou laiti o loo fiafia i nei taaloga, pei ona molimauina i le siitia o le tulaga ua oo iai taumafaiga a tupulaga o loo aafia ai.

## **Galuega Atinae mo Tupulaga Talavou – (Pe avea ma galuega aloaina)**

O se tasi lenei o vaega sa faaauuina i le tausaga faaletupe lenei, o le Tipiloma mo le Atinae o Tupulaga Talavou faatupeina i lalo o le Polokalame a Malo o le Taupulega mo Tupulaga Talavou. Sa faatinoina e le Vaega mo Tupulaga Talavou faatalanoaga ma faalapotopotoga tumaoti faapea Matagaluega a le Malo i ni avanoa e galulue faamasani ai i latou sa auai i

lenei polokalame faa Tipiloma. O le talitonuga na faavae ai lenei polokalame, o se tasi o taumafaiga e atinae ai tomā ma agavaa faa-polofesa o talavou, ma o galuega faa masani sa galulue ai i latou sa aoga i lenei polokalame, o se tulaga muamua lea ua faia mo tupulaga o Samoa. E toa 6 i latou na aoga o loo ofoina fua la latou auaunaga i le Ofisa o le Sosaiete a le Koluse Mumu i Samoa faapea le Faalapotopotoga mo le Soifua Manuia o Aiga i Samoa. O galuega faamasani nei o le a maua ai le avanoa o i latou o loo faamanuiaina ai e malamalama ai i galuega mo tupulaga talavou ma ituaiga faafitauli o loo feagai ma i latou ma manaomia ai lo latou galulue faatasi ma ia tupulaga. E toa 17 i latou o le a faaauuina le aoga i le tausaga fou ma faamoemoe e faauuina i latou i le faaiuga o le 2011.

### **Suesuega mo le Faatuina o le Fono Aoa mo Tupulaga Talavou**

O le suesuega mo le faatuina o se Fono Aoa mo Tupulaga Talavou na faatinoina a ala i se galuega faapaaga ma le Polokalame a le Malo o Ausetalia mo le Pasefika i tomā faa Taitai. O lenei suesuega o se taumafaiga e sailiili tulaga uma e toe faatuina ai se Fono Aoa Tumaoti mo Tupulaga Talavou latou te taulamua i le faatinoina o polokalame ma auaunaga mo le atinae o tupulaga. O le toe faatuina o se Fono Aoa mo Tupulaga Talavou, o loo agai tonu foi lona faatinoga i le ausiaina o le faamoemoe o le Polokalame mo le Toe Fuataiina o Galuega a le Malo lea ua fautuaina ai Matagaluega a le Malo e faamalosi le latou matafaioi i tulaga tau faiga faavae ma le faatonutonuina o galuega faatino a o le vaega tumaoti pei o le Fono Aoa mo Tupulaga Talavou o le a nafa ma le faatinoina o polokalame ma auaunaga. O le ripoti o lenei suesuega ua tuuina mai ai ni fautuaga i le Matagaluega ina ia toe faatuina le Fono Aoa mo Tupulaga, ma o le a toe asia ia fautuaga i le tausaga faaletupe fou.

### **Faiaoga e Tupulaga Faatasi**

O se tasi lenei o Polokalame o loo faaauuina pea lona faamaopoopoina e le Vaega mo Tupulaga Talavou e ala i se faa-paaga ma le Sosaiete a le Koluse Mumu faapea le Faalapotopotoga Faavae o le Faamai Oti o le AIDS i Samoa, lea e ofo fuaina ai le auaunaga a tupulaga talavou mo polokalame atinae o le soifua maloloina e faatinoina i tua. E silia ma le 100 faiaoga talavou e tupulaga faatasi ae 300 i latou ua ofo fua la latou auaunaga ua resitaraina ma aogoina i mataupu tau soifua maloloina i tulaga tau feusuaiga ma le fanauina o tamaiti.

### **Polokalame i le Televisi “Faataua Lou Talavou”**

O se tasi lenei o taumafaiga e faalauiloa ai ma faatauaaina galuega faatino a tupulaga talavou mo le atinaeina o le soifua agafesootai ma le tamaoaga, o ni galuega e taulamua ai lava latou. O lenei polokalame ua faalauiloaina ai atinae ua faamanuiaina a tupulaga talavou taitoatasi faapea faalapotopotoga i vaega eseese o nuu ma afioaga (ft: taaloga, soifua maloloina, pisinisi, galuega taulima), faapea foi auaunaga eseese a Matagaluega a le Malo faapea faalapotopotoga tumaoti. Sa faalauiloaina ai foi feau taua mo tupulaga talavou i nuu ma afioaga, ma o se tasi foi lea auā na saga faalateleina ai le silafia o tagata i le Polokalame o le TALAVOU ma le faatinoina o le Faiga Faavae Aoa mo Tupulaga Talavou o Samoa 2001-2011. E 10 polokalame tai 30 minute na faasalalauina e le TV One mo le umi e sefulu vaiaso, ma e tele ni finagalo faaalā mai le mamalu o le atunuu sa fialia e matamata i lenei polokalame.

### **Aooga Faa-pisinisi mo Tupulaga Talavou**

Sa mafai e le Vaega mo Tupulaga Talavou ona faatino ni aooga faapisinisi mo tupulaga talavou faapea le tuuina atu o fesoasoani tupe mo le atinaeina o latou pisinisi laiti i lalo o le faa-paaga ma le Ofisa mo le Atinae o Pisinisi Laiti, le polokalame Faavaomalo a le Faalapotopotoga o Leipa ua taua 'Amata lau Oe lava Pisinisi' ma le 'Aooga e tapena ai mo se poloketi'. O pisinisi ua maitauina le alualu i luma, ua tuuina atu i lalo o polokalame o loo faatupeina pisinisi laiti ina ia siitia le fesoasoani tau tupe aemaise o le saga tapueina atili.

### **Tali atu i Sauaga o feagai ma Tina ma Tamaitai ma Tamaiti**

Sa faaauauina pea galuega mo le tafieseina o sauaga faasaga i tina ma tamaitai, e ala i polokalame sa faatupeina i le tala o le tupe a le Malo faapea le *Poloketi mo le Tafieseina o Sauaga* faatupeina e le UNFPA, i totonu o le tausaga faaletupe lenei. O se tasi o galuega sa faamamafaina o le faamaeaina o le *Tulafono Tau Faaofi mo le Saogalemu o Aiga* faapea le mauaina mai o le lagolago a le Matagaluega o Faamasinoga latou te faagaioiina leni tulafono. E le gata i lea a o le tapenaina, lolomiina ma faalauiloaina o faamatalaga, sa faaauauina pea ona fai ma sao o le Matagaluega e momoli ai feau eseese i auala e faaitiitia ai sauaga. Sa faatinoina foi faatalanoaga ma le Matagaluega o Leoleo ma Falepuipui i le fausia o se *Fetaulaiga o Fesootaiga Tuufaatasi a Matagaluega/Faalapotopotoga* uma o loo taunuu iai i latou ua aafia i sauaga mo se laveai. O lenei faiga o le a faamautinoaina ai le oo atu o le fesoasoani moomia e i latou uma ua aafia i sauaga e ui mai i fesootaiga o lenei *Fetaulaiga o Fesootaiga*. E faamoemoe le Matagaluega o Tina ma Tamaitai Atinae o Nuu ma Afioaga ma Agafesootai i lana matafaioi taiulu i le Feagaiga mo le Tafieseina o Soo Se Faailoga Tagata Faasaga i Tina ma Tamaitai faapea le Feagaiga mo Aia Tatau a le Tamaitiiti, o leni *Fetaulaiga o Fesootaiga Tuufaatasi* e fausia mai i luga o fesootaiga ua leva ona galulue ai ma le Matagaluega o Leoleo ma Falepuipui faapea Faalapotopotoga Tumaoti i le faaitiitiga o sauaga aemaise o le tuuina atu o le fesoasoani moomia mo i latou ua aafia i sauaga. O lea foi ua faataunuuina ai le matafaioi lagolago a le Matagaluega o Tina ma Tamaitai Atinae o Nuu ma Afioaga ma Agafesootai mo faalapotopotoga uma o loo tuuina atu auaunaga mo i latou ua aafia i sauaga, e pei ona avea ai ma taiulu o Feagaiga Faavaomalo mo le Tafieseina o Soo Se Ituaiga Faailoga Tagata Faasaga i Tina ma Tamaitai. O le Poloketi o mo le Tafieseina o Sauaga faatupeina e le UNFPA ua toe faaopoopo lona taimi mo leisi ono masina talu ai le tuai taunuu mai o seleni mai fafo mo le faagaioiina.

### **Faafaletui a le Itupa o Alii e Tetee atu ai i Sauaga**

O le Suesuega a Samoa mo le Saogalemu ma le Soifua Maloloina o Aiga 2000, na faailoa ai e 46 pasene o tamaitai sa suesueina, o i latou e fai aiga sa sauaina e o latou taitoalua. O le ala lea na manaomia ai le faatulaga lelei o se faiga e aafia ai vaega eseese o le atunuu e tetee atu i leni faafitauli o le sauaina o tina ma tamaitai.

O se tasi o galuega sa faatino e le Matagaluega i ana taumafaiga mo le faaitiitia o leni faafitauli, o le faatuina lea o le "*Faatofalaiga a le Itupa o Alii e Tetee atu i Sauaga*" ina ua maea ai se polokalame sa faatino ele Matagaluega mo alii ma faipule i Upolu e faailoga ai le Aso

Faavaomalo mo Tina ma Tamaitai 2008. O se galuega sa taulamua ai le Vaega mo Tina ma Tamaitai ma lagolagoina lona faatupeina e le Poloketi mo le Tafieseaa o Sauaga, ina ia aafia ai alii ma tama laiti latou te faalauiloaina ma faatalanoaina auala e tafieseaa ai soo se ituaiga sauaga aemaise lava sauaga i totonu o aiga.

E toa 20 sui o le *Faatofalaiga* e aofia ai Sui o le Nuu ma sui o alii ma faipule mai nuu e 20. Sa faasolo le faatinoga o aoaoga ma sui o le *Faatafoalaiga* faapea Sui o le Nuu e ala i le talanoaina o iuga o le *Suesuega a Samoa mo le Saogalemu ma le Soifua Maloloina o Aiga 2000*, faapea lo latou talanoaina o le faafitauli o sauaga ma lo latou sao taua faapea lo latou tiute e taulamua ai i le faalauiloaina ma le laugaina o auala e tetee atu ai i lenei faafitauli.

O taunuuga lelei o nei aoaoga ma faatalatalanoaga sa faatinoina ma le itupa o alii, o le faatuina lea o le vaega ua faaigoaina o le '*Faatofalaiga a le Itupa o Alii e Tetee atu i Sauaga*', o le tapenaina o le Taiala mo le Faatinoina o Faatofalaiga i Nuu - o se auupega taua o le a faaaogaina i nuu ma afioaga e lagolagoina ai taumafaiga mo le suia o lagona ma amioga a le itupa o alii; faatinoina faatofalaiga i nuu e 6 ma faataitai ai le faaaogaina o le tusi taiala pei ona tapenaina. O nuu ia e aofia ai Satuiatua, Salelavalu, Malaemalu, Vailele, Alamagoto ma Toamua. E le gata i lea, sa faasolosolo mai luga o ala ea faatalanoaga a sui o le Faatofalaiga ina ia o gatasi ma le galuega o loo faagasolo i nuu, o faatalanoaga i le televise, faatalatalanoaga i le leitio faapea faasalalauga i nusipepa sa lolomiina.

### **Polokalame mo le Puipuiina o Tamaiti**

O galuega tapenapena mo le Suesuega lona lua mo le sueina o le *Iloa, Uiga, Amio ma Faatinoga i le Puipuiina o Tamaiti*, sa ave iai le faamamafa o galuega o lenei tausaga. O lo o sailia i lenei suesuega pe ua iai ni suiga i le iloa, uiga faaalua, amioga faaalua ma faatinoga a tagata o nuu m afioaga o le a suesueina, faatusatusa i iuga i le uluai suesuega i le 2003/2004. O se avanoa foi lea e sailia ai pe o iai se aoga o le galuega a le Matagaluega o Tina ma Tamaitai Atinae o Nuu ma Afioaga ma Agafesootai o loo faia mo le puipuiina o tamaiti, talu ona amatalia le galuega a le *Polokalame mo Tamaiti o le Pasefika* ia Novema 2002. O le Vaega o Tina ma Tamaitai faatasi ma le *Komiti Aoao o le Feagaiga mo Aia Tatau a le Tamaitiiti* sa latou faamaonia le Fuafuaga o le Suesuega o loo taiala ai le faatinoga o lenei galuega. O le a iai se *Taitai o le Suesuega* na te faatautaia lenei galuega ma galulue vavalalata ma le Matagaluega e ala i le afaigaluega a le Vaega o Suesuega Faiga Faavae ma Fuafuaga, a o le Vaega mo Tina ma Tamaitai o le a feagai ma auunaga lagolago a o avea ma taiulu mo le puipuiina o tamaiti. O le *Komiti Aoao o le Feagaiga mo Aia Tatau a le Tamaitiiti* o loo taitaifono ai le Ofisa Sili o Pulega o le Matagaluega o le a faatonutonuina ma faia faaiuga o le faagasologa o lenei Suesuega i le tausaga faaletupe fou.

### **Polokalame Faataitai mo le Faatumauiina o Atinae Manuia i Nuu ma Afioaga**

O le tausaga lenei na amata aloaia ai le *Polokalame Faataitai mo le Faatumauiina o Atinae Manuia i Nuu ma Afioaga* o loo faatupeina e le UNDP. O le tuufaatasiga o lenei polokalame sa faatino muamua se fuafuaga tapenapena i lalo o le taitaiga a le Matagaluega o Tina ma Tamaitai Atinae o Nuu ma Afioaga ma Agafesootai, sa auai paaga galulue ae faatonutonu e

le vaega sa tapenaina le poloketi. O le auala sa faatino ai le tuufaatasiga o le polokalame, sa faaoga nisi o metotia e faamamafaina ai le tagai i le itu lelei o se faafitauli na I lo le faaaliali o itu le lelei (Appreciative Inquiry), e le gata i lea o le faamamafa o le fefaasoai ma soalaupule faatasi ma nuu ma afioaga i tua o se mataupu, ina ia aua nei pito tasi le faiga o faaiuga fai. O auala ia sa uia muamua e faatino ai se suesuega amata e faailoa mai ai ni manaoga o loo iai i totonu o nuu ma afioaga. O se tasi vaega o le polokalame o le tapenaina lea o Fuafuaga a NuU mo Atinae Faaauau, e faavae ai ni a latou talosaga mo le faatupeina o vaega o loo moomia mo le atinae manuia, ma sa faataunuu faatasi ia tapenaga ma polokalame faagasolo e aoaoina ai tomai ma agavaa o tina ma tamaitai, i le atinae o nuu ma afioaga, ina ia mautinoa o loo tutusa le auai o le itupa o alii ma le itupa o tamaitai i le polokalame. O le famoemoe o leni Polokalame ia fesootei ma isi foi polokalame faaauau a le Malo ina ia saga tapueina le silafia o nuu ma afioaga latou te auai ai i le fausiaina, taitaiina ma le faafoeina o a latou poloketi laiti. O aoaga mo le atinae o tomai ma agavaa o le a faamalasia le auai o nuu ma afioaga i le talanoaina o mataupu pei o tapenapenaga agai i le suiga o le tau, aemaise le faamaopoopoina o faalapotopotoga, atinaeina o tagata faigaluega, pulega lelei i nuu ma le aoaoina o nisi latou te faatinoina aoaga.

O le tausaga faaletupe leni, sa faamaeaina ai galuega faatino a le *Polokalame Faataitai mo le Faatumauina o Atinae Faaauau i NuU ma Afioaga* e ala i le tapenaina o Fuafuaga a NuU mo Atinae Faaauau mo nuu e iai Lano, Manono, Mutiatele ma Malaela. O fonotaga faatalatalanoa sa faatinoina ma nuu ua taua, sa faailoa mai ai ituaiga faafitauli o loo feagai ma i latou, o latou malosiaga o loo iai e mafai ai ona latou foia nei faafitauli, ma tuuina loa I totonu o le Fuafuaga a le NuU faatasi ai mavaega o loo moomia ai le fesoasoani. O le faatinoga o le Polokalame leni o loo faamaopoopoina i lalo o le taitaiga a le Vaega mo le Lotoifale, i se auala aoao tetele e aofia ai ma isi vaega eseese o loo tofu sao i le atinaeina o nuu ma afioaga, ma o i latou ia sa faatinoina fonotaga faatalatalanoa ma tapenaina faatasi ma nuu ma afioaga a latou Fuafuaga.

Ua saga faalauteleina e le *Polokalame Faataitai mo le Faatumauina o Atinae Manuia i NuU ma Afioaga* le agaga o le *Footaiga Lelei Tuufaatasi* o loo faagaioiina ai foi le Polokalame o le Aiga ma NuU Manuia i le 10 tausaga talu ai, lea ua tino mai i le faia o Fuafuaga a NuU mo Atinae Faaauau. E maitauina e le Matagaluega le taua o leni Polokalame i le faaleleia atili o ana galuega e ala i le faamalasia o fesooteaiga lelei ma le faamaopoopoina o galuega faatino, tuliloaina ma le iloiloaina o galuega atinae mo nuu ma afioaga ina ia o gatasi ma le Fuafuaga a le Vaega mo NuU ma Afioaga.

I le Ata Faataitai o le Fuafuaga mo le Vaega o NuU ma Afioaga 2009-2019 o loo taumafai e tali atu i faafituli o loo faailoa mai e nuu ma afioaga, ma galulue faatasi ma i latou ina ia taulamua i le faatinoga o auala e foia ai faafitauli o loo tulai mai.

O le metotia o loo faaogaina e leni Polokalame o le faatauinaina lea o malosiaga o loo i totonu o nuu ma afioaga, ma ua gatasi ai ma le galuega faatino a le Matagaluega o Tina ma Tamaitai Atinae o NuU ma Afioaga ma Agafesootai. Talu ai le sologa manuia o le Polokalame leni e ala i le tuufatasiina o finagalo ma le tapenaina o Fuafuaga a NuU mo Atinae Faaauau, o lea ua faalauteleina atu ai e aofia ai nuu na aafia i le galulolo. O le a faaauauina galuega o leni Polokalame i le tauaga faaletupe o le a sosoo nei.

## **2.4 Uunaia o Talitonuga i Avanoa Tutusa Mo le Mauaina o Avanoa e Vaega Uma o le Atunuu**

O le Matagaluega o Tina ma Tamaitai Atinae o Nuu ma Afioaga ma Agafesootai o loo avea ma taiulu i mataupu tau “avanoa tutusa” (kenera). Peitai o loo iai pea feseeseaiga o talitonuga i lenei mataupu ma ua avea pea ma luitau. O le tausaga faaletupe lenei sa taumafai pea e uunaia avanoa tutusa mo alii ma tamaitai i totonu o faiga faavae aoao ma fuafuaga, ina ia mauaina uma e vaega eseese o le atunuu ia avanoa. O se tasi o vaega o loo i totonu o le *Polokalame mo le Faamalositia ma le Siitia o Tomai ma Agavaa o le Matagaluega* o le faia lea o ni aoaoga i le faatinoina o Iloiloga, faavae i le iai o avanoa tutusa mo alii ma tamaitai, ina ia mafai e le Matagaluega ona faaoga lea auupega e iloilo ai faiga faavae, tulafono ma isi uma faamaumauga e aofia ai polokalame aoao tetele. E le natia e le Matagaluega o se tasi lenei o vaivaiga tele o loo iai i tulaga tau tomai ma agavaa, ae o loo faamoemoe i lana *Polokalame mo le Faamalositia ma le Siitia o Tomai ma Agavaa o le Matagaluega*, faapea isi ituaiga fesoasoani, o le a mafai ai ona faatino ia ituaiga iloiloga mo ana faamaumauga uma o loo iai.

### **Tusi o Faamaumauga mo Alii ma Tamaitai**

O se tasi lenei o galuega sa faatinoina i le tausaga faaletupe lenei. O le faamoemoe o nei tusi o le faamaumauina lea o agavaa, tomai ma silafia o alii ma tamaitai ma mafai ona faaogaina e faavae ai filifiliga o tulaga tofi faa taitai pei o le filifilia o sui auai o Komiti Faafoe a le Malo. E le gata i lea a o se avanoa lea e faafetaia ai galuega ma le tautiga o i latou sa latou taitaiina Matagaluega ma Faalapotopotoga a le Malo ma tele lo latou sao i le atinaeina o Samoa i le sefulu tausaga ua tuana'i.

## **2.5 Pulega Faa-Ofisa ma le Atianeina o le Auaigaluega**

O auaunga ma pulega faa-ofisa faapea le vaega mo le atianeina o le auaigaluega, o vae ma lima ia o soo se Matagaluega. O le Vaega o Pulega faa-Ofisa sa faaauauina pea la latou tautua ma le lagolago e ala i le faafoeina o tulaga tau tupe ma pulega lautele a le Matagaluega.

### **Vaega o Tupe ma Pulega Lautele**

O le tuufaatasiga o le Tala o le Tupe ma le mataituina o le faaogaina o tupe, o se tasi lea o matafaioi atu a le Vaega o Pulega Faa-Ofisa. O le faaogaina o auala ua uma ona faataatitia mo le faatauina o oloa ma auaunaga moomia e le Matagaluega, na fesoasoani tele i le faatinoina o galuega ma auaunaga a vaega uma o le Matagaluega. O isi tiute e aofia le totogiina atu o totogi o le auaigaluega togi aso, totogiina atu o alauni mo Sui o le Nuu ma Sui Tamaitai o le Nuu faapea Komiti eseese o loo i lalo o le Matagaluega. O se tasi vaega taua ua uma ona faailoa i le Vaega o Tupe, e moomia le fesootai lelei o le tapenaga o le

Tala o le Tupe ma fuafuaga faataatitia a le Matagaluega. O le taimi nei o loo tapena ese lava le Tala o le Tupe i lona taimi faatulagaina, e le o o gatasi ma le tapenaga o le Fuafuaga Faaletausaga a le Matagaluega. Sa faatalanoaina lenei tulaga ma le afaigaluega ma o le amata faatino lenei suiga i le tausaga faaletupe fou. O le manaomia foi o le toe iloilo o lisi o tiute o le afaigaluega, ma le moomia o le o gatasi o fuafuaga faale vaega ma le Fuafuaga Autasi a le Matagaluega, o nisi ia o vaega sa lagaina e tagai iai a o agai atu i le faatinoina o le Faiga Faavae mo le Iloiloina o Galuega Faatino lea e taitaiina e le Ofisa o le Komisi o Galuega a le Malo.

I le tulaga o pulega lautele, sa faatinoina foi le lagolago a le Vaega o Pulega Faa-Ofisa e ala i le tausia o faila ma faamaumauga, faafaigaluegaina o le afaigaluega fou, mataituina o aso malolo/aso mai o le afaigaluega faapea aso ma taimi faigaluega, aemaise le tuliloaina o faiga faavae ma tulafono mo le afaigaluega a le Malo. Sa faatinoina foi aoaoga mo le afaigaluega fou a le Matagaluega faapea le faamalamalamaina o le Tala o le Tupe a le Matagaluega, ma o nisi ia o matafaioi autu a le Vaega mo Pulega Faa-Ofisa.

### **Atinae o le Afaigaluega**

O le atinaeina o le afaigaluega o loo faaauauina pea ona faatino mai lea taimi i lea taimi a o loo faatalia le tapenaina o le Fuafuaga mo le Atinae o le Afaigaluega. E manaomia le iai o se Fuafuaga mo le Atinae o le Afaigaluega e faailoa ai ituaiga tomai ma agavaa o loo moomia e le afaigaluega, ina ia o gatasi ma le Fuafuaga Autasi, ma o se tasi leni o galuega a le Matagaluega o loo faatali. O nisi o faafitauli o loo iai le taimi nei o le lava o le afaigaluega, le lava tomai ma agavaa ma o i latou o le a tuufaatasia leni galuega o le a tagai i le faatinoina o lea fuafuaga i le tausaga faaletupe fou. O loo iai foi le faamoemoe e maua le fesoasoani mai le Polokalame mo le Faamalosia ma le Siitia o Tomai ma Agavaa o le Afaigaluega e faamautu ai le Fuafuaga mo le Atinae o le Afaigaluega ina ia o gatasi ma le vaaiga taulai a le Matagaluega.

### **Puleaina o Aseta ma Fale o le Matagaluega**

O le Vaega o Pulega Faa-Ofisa o loo nafa ma le vaaiga o aseta faapea fale o le Matagaluega. Sa faatino se asiasiga o aseta i le tausaga leni ina ia mautinoa o loo lelei ona tausia ma faaogaina pea e le afaigaluega.

#### ***o Tatalaina o le Maota toe Faaleleia o le Tooa Salamasina***

O se tasi leni o tulaga iloga ua ausia e fia faailoaina I leni ripoti, o le toe tatalaina o le Maota o le Tooa Salamasina ina ua maea ona toe faafou ma faalauteleina, lea na faataunuuna ia Iuni 2010. O leni galuega e 12 masina na faatino ai ma na mafai ona faatinoina ona o fesootaiga ma faatalanoaga sa taulamua ai le Afioga i le Minisita ma Sui o le Malo o Saina. O le toe tatalaina o le Maota o le Tooa o se tasi o atinae iloga i le tala faasolopito o le Matagaluega, aua ua maua ai le avanoa e tuufaatasi ai le Matagaluega i lalo o le fale e tasi, sei vagana le Vaega mo le Lomitusi. O le faamaeaina o leni galuega o le amataga lea o fesootaiga lelei ma le galulue faatasi, faamalosia se aganuu faale Matagaluega ma le fausiaina o se faasinomaga e patino lava i le Matagaluega o Tina ma Tamaitai Atinae

o Nuu ma Afioaga ma Agafesootai. O le tausaga faaletupe fou o le a nofoia ai e le Matagaluega le maota fou.

## **2.6 Faagasologa o Galuega a le Matagaluega**

### **Iloiloga ma le Tapenaina o Fuafuaga a le Matagaluega**

O loo avea pea ma luitau le taumafai e tapue, uunai ma faatino se aganuu faa le Matagaluega e faavae i le fesootea lelei ma le galulue faatasi, talu mai lava ona faavae le Matagaluega o Tina ma Tamaitai Atinae o Nuu ma Afioaga ma Agafesootai. O le tausaga leni, i lalo o le taitaiga a le Ofisa Sili o Pulega fou, sa faatino ai le Iloiloga fai faatasi a le Matagaluega ma faaogaina le agaga o le iloilo faatasi ma fuafua faatasi. E moni sa faatino iloiloga ma fuafuaga i tulaga faa vaega ae o le taimi muamua leni ua aumai faatasi ai le Matagaluega e faatino faatasi lana Iloiloga. O leni faatinoga ua tatala ai le avanoa o le Matagaluega ato e iloilo ai galuega sa faatino i le tausaga ma maua ai foi le avanoa o i latou e tupulaga faatasi e fetufaai ma fefaasoai lagona ma manatu. O se faiga taua tele e faaleleia atili ai le galulue faatasi; siitia ai le malamalamaaga o le afaigaluega i le galuega a le Matagaluega, ma latou iloaina ai galuega o loo faatinoina e isi vaega o le Matagaluega.

E lua Iloiloga sa faatinoina i le tausaga faletupe leni. Sa faalia lagona fiafia o le afaigaluega aua ua maua lo latou avanoa e soalaupule ai faafitauli o feagai ma i latou i le faatinoina o latou galuega, ma ua faailoa ai foi le tinou o le afaigaluega e auai. O se tasi o galuega faatino mai leni Iloiloga o le tuufaatasia o le fuafuaga mo le ono masina a le Matagaluega, fausia mai luga o le Fuafuaga Faaletausaga a le Matagaluega. O le tuliloaina o nei fuafuaga sa faatino i masina taitasi e ala i fonotaga a le Komiti o le Pulega ma fonotaga a le Pulega.

### **Polokalame mo le Faamalositia ma le Siitia o Tomai ma Agavaa o le Matagaluega**

O taumafaiga e toe asia ma faamautu le Auivi o le *Polokalame mo le Faamalositia ma le Siitia o Tomai ma Agavaa o le Matagaluega* na faatinoina i le afa mulimuli o le tausaga faaletupe leni. Ua iai le Auivi o Fuafuaga ua maea ona toe tuufaatasia ma ua taliaina mo le tuuina atu i le fonotaga a le Komiti Atinae a le Kapeneta ia Iuni 2010, ma le faamoemoe e ioeina ma taliaina aloaia i le fonotaga a le Komiti ia Aokuso 2010.

### **Feagaiga Faa-Uo ma le Matagaluega mo le Atinae o le Soifua Lautele (Malo o Niu Sila)**

O le fonotaga sa faia ma le Hai Komesina o Niu Sila ia Ianuari 2010, o se toe tuliloaina o talanoaga na faia i le va o Malo e lua, Niu Sila ma Samoa, lea na faia i le tausaga 2009. O se mataupu faapitoa o le fesoasoani maua mai lalo o le Maliega faale Uo ina ia talia ai nisi o manaoga faasino i le Matagaluega o Tina ma Tamaitai Atinae o Nuu ma Afioaga ma Agafesootai.

O se tasi o vaega na faaauau mai i le talanoaga a le Minisita ma le Ofisa Sili o Pulega a le Matagaluega o le Atinae o le Soifua Lautele (Malo o Niu Sila), o le taliaina lea ma le uunaia

o le galulue faatasi o Matagaluega e lua. E tele malosiaga faa-fesoootaiga o loo iai i nei Matagaluega e lua. E agai tonu a la galuega faatino i le tautuaina o tagata, e agai faatasi a la matafaioi i le atinaeina o tagata lautele ma o loo taulamua i le atinaeina o agafesootai. O le Matagaluega o le Atinae o le Soifua Lautele (Malo o Niu Sila), e iva ana matafaioi faapisinisi o loo faagaoioiina i lalo o vaega tetele e tolu, ma ua mafai ona fesoootai lelei ma o gatasi ia matafaioi i lalo o le vaega taulai e tasi. E le pei la o le Matagaluega o Tina ma Tamaitai Atinae o Nuu ma Afioaga ma Agafesootai, o loo avea pea ma luitau le galulue agai i se vaega taulai e tasi. Sa iai le faamoemoe o le *Polokalame mo le Toe Faamalosi ma le Siitia o Tomai ma Agavaa* o le Matagaluega o le a fesoasoani i le toe fetuunaiga o vaega e ave iai le faamuamua, peitai talu ai le tulaga o loo iai lea vaega i le taimi nei, a ua moomia le tuufaatasia o se faiga faavae mo agafesootai faapea se polokalame e atinae ai tomai ma agavaa, o lea ua talafeagai ai le galulue faatasi ma le Matagaluega o le Atinae o le Soifua Lautele (Malo o Niu Sila) e maua ai lea ituaiga fesoasoani.

I se taimi tau faaii le tausaga faaletupe lenei, na faia ai se fonotaga ma le Sui Ofisa Sili o Pulega o le Matagaluega o le Atinae o le Soifua Lautele (Malo o Niu Sila) i Samoa nei. O le amataga lea o se fesoootaiga alualu mamao ma le Matagaluega, ina ia mafai e le Matagaluega o Tina ma Tamaitai Atinae o Nuu ma Afioaga ma Agafesootai ona malamalama i le faagaoioiina o gauega ma le siosiomaga o loo galulue ai le Matagaluega mai Niu Sila ma faatulaga ina ia o gatasi ona matafaioi i vaega talafeagai, i le faatulagaina o galuega faatino. O le fesoootaiga soosootauau i le va o Matagaluega e lua o se avanoa taua lea e maua mafutaga faa taitai a Ofisa Sili o Pulega o Matagaluega e lua ma maitauina le tele o taumafaiga ma fesuiiga a le Matagaluega o le Atinae o le Soifua Lautele (Malo o Niu Sila) ua faamanuiaina lona faatinoga. O le fesoootaiga ua faia nei ma le Matagaluega o le Atinae o le Soifua Lautele (Malo o Niu Sila) o loo faaauau mai le tulaga o loo iai nei fetuunaiga ma le Matagaluega o Mataupu tau Atumotu o le Pasefika lea e maua mai ai le fesoasoani faapitoa a le Faufautua Faapitoa i mataupu tau Faiga Faavae pei ona taua i se vaega o i luga o lenet ripoti.

## **2.7 Galuega ma Fonotaga Faaitulagi ma Faavaomalo**

### **Feagaiga mo le Tafieseaa o Soo Se Ituaiga Faailoga Tagata Faasaga i Tina ma Tamaitai ma le Feagaiga mo Aia Tatau a le Tamaitiiti**

O le avea o le Matagaluega o Tina ma Tamaitai Atinae o Nuu ma Afioaga ma Agafesootai ma taiulu o le Feagaiga mo le Tafieseaa o Soo Se Ituaiga Faailoga Tagata Faasaga i Tina ma Tamaitai ma le Feagaiga mo Aia Tatau a le Tamaitiiti, ua agai ai foi ana galuega faatino i le faataunuuina o ona tiute faavaomalo ina ua sainia nei Feagaiga.

I le tulaga tau ripoti, sa agai taumafaiga e faamaea ma toe faaleleia atili le Ripoti lona lua a Samoa mo le Feagaiga o le Tafieseaa o Soo Se Ituaiga Faailoga Tagata Faasaga i Tina ma Tamaitai - lea ua tuufaatasia ai le Ripoti lona Fa ma le Lima a Samoa mo le faatinoina o lenei Feagaiga. Na tuuina aloaia atu e auala i le Matagaluega o le Va i Fafo lenei Ripoti i le Komiti a Malo Afaatasi mo le Feagaiga mo le Tafieseaa o Soo Se Ituaiga Faailoga Tagata Faasaga i Tina ma Tamaitai. O le a logoina mai e le Komiti o Malo Afaatasi le Malo o

Samoa i le taimi e fesilafai ai e talanoaina lenei Ripoti. O le ripotiina o le Feagaiga mo Aia Tatau a le Tamaitiiti o loo faatalia ma ua amata galulue le aufaigaluega i le aoina o faamatalaga mo le tuufaatasiina o le ripoti lona lua mo le Feagaiga i Aia Tatau a le Tamaitiiti i le tausaga faaletupe fou.

I tulaga o le faatinoina o nei Feagaiga i le tausaga lenei, o loo faaauina pea le faamaopoopoina i lalo o le Vaega mo Tina ma Tamaitai. E tele galuega ma polokalame sa faatinoina i lalo o le agaga o nei Feagaiga, pei ona maua i le Auivi o Galuega oloo faapipiina atu. O le Feagaiga mo le Tafieseaa o Soo Se Ituaiga Faailoga Tagata Faasaga i Tina ma Tamaitai o loo taiala ai le galuega mo le siitia o le tulaga o Tina ma Tamaitai ma o loo faogaina faatasi ma le Fuafuaga o Galuega a le Lalolagi lea na taliaina I Beijing, o le Fuafuaga o Galuega a le Pasefika ma le Fuafuaga o Faatinoga a Malo Aufaatasi mo Tina ma Tamaitai. O nei Fuafuaga uma ua faaliliuina i totonu o le Fuafuaga o Galuega Faatino mo le Atinae o Tina ma Tamaitai o Samoa lea sa taialaina ai galuega mo le faatinoina o le Feagaiga mo le Tafieseaa o Soo Se Ituaiga Faailoga Tagata Faasaga i Tina ma Tamaitai i lenei tausaga.

E pei o le Feagaiga mo le Tafieseaa o Soo Se Ituaiga Faailoga Tagata Faasaga i Tina ma Tamaitai, ua faapena foi ona avea le Feagaiga mo Aia Tatau a le Tamaitiiti ma taiala o galuega faatino mo le puipuiina o tamaiti i Samoa. Ua faaliliuina foi lenei Feagaiga i le Fuafuaga o Galuega Faatino mo Tamaiti, ma o le faavae foi lea o le polokalame mo puipuiina o tamaiti i lenei tausaga. Sa faatinoina foi se iloiloga o galuga faatino i le tausaga lenei mo le Vaega o Tina ma Tamaitai i lana matafaioi taiulu i le faamaopoopoina o le Feagaiga mo le Tafieseaa o Soo Se Ituaiga Faailoga Tagata Faasaga i Tina ma Tamaitai, ma le Feagaiga mo Aia Tatau a le Tamaitiiti. O nisi o vaega na aliali mai i nei iloiloga ua tele vaega ua agai pea i luma ma lelei ona faatino, ae o loo iai isi vaega o galuega faatino o loo avea pea ma luitau ma manaomia le toe uunaia pea ina ia faatelevave ma faaalualuina pea i luma le galuega mo le puipuiina o tamaiti faapele siitia o tulaga o Tina ma Tamaitai. Sa faasoa atu iuga o lenei iloiloga i sui auai o le Faapaaga o le Feagaiga mo le Tafieseaa o Soo Se Ituaiga Faailoga Tagata Faasaga i Tina ma Tamaitai, ma le Faapaaga o le Feagaiga mo Aia Tatau a le Tamaitiiti. O le Auivi o Galuega pei ona faapipiina atu o loo faamatala ai galuega eseese sa faatino I le 2009/2010 ina ia o gatasi ma tiute faale malo o Samoa ina ua ia sainia nei Feagaiga.

### **Isi Tiute Faavaomalo – Ripoti Lona Lua a Samoa mo Sini Atinae o le Meliniuma**

Sa auai foi le Matagaluega lenei i le tapenaina o le Ripoti lona lua a Samoa mo Sini Atinae o le Meliniuma lea sa tuufaatasiina e le Matagaluega o Tupe. O le Sini Atinae lona 3 o le Uunaia o Tulaga Tutusa o Alii ma Tamaitai ma le Siitia o le Tulaga o Tina ma Tamaitai, na auala atu ai le sao o le Matagaluega. E le gata i lea sa faia foi le sao o le Matagaluega i nisi o ripoti sa tuufaatasia e le Matagaluega o le Va i Fafu ma Fefaatauaiga. O vaega ia e aofia ai Iugafono mo le Sauaina o Tina ma Tamaitai, Iloiloina o le Fuafuaga a le Pasefika e aofia ai le galuega mo le *Auala e Faatupeina ai Polokalame* a le Ofisa o le Faalapotopotoga mo le Pasefika (SPC). E faatauaina e le Matagaluega galuega faapenei aua e maua ai avanoa e faailoina atu ai mataupu ma galuega patino o loo ia faatino ina.

## **Tali Malo i le Au Malaga a Tamaitai mai le Malo o Saina**

O se tasi o tulaga maualuga i le faatinoina o tiute faavaomalo o le Matagaluega e aofia ai le taliga o le Aumalaga a Tamaitai mai le Malo o Saina o sui o le Faalapotopotoga a Tina ma Tamaitai o lea Malo lea e foliga tutusa a latou galuega ma le galuega a le Matagaluega o Tina ma Tamaitai, o i latou o loo taulamua foi i le atinaeina o tina ma tamaitai o Saina. O se avanoa sa fetufaai ai ma faatalanoaina nisi o mataupu o loo feagai ma tina ma tamaitai o malo e lua, ma faapena ona fefaasoai i auala o loo sologa lelei le faatinoga e faaleleia atili le soifuaga o tina ma tamaitai. Sa faatino se fonotaga e faasoia mai ai le Faalapotopotoga mai Saina I nisi o atinae o loo latou faatinoina e uunaia ai tina ma tamaitai e faatino atinae. O se tasi o le aumalaga o le Sui Taitaifono o le Komiti a Malo Aufaatasi mo le Feagaiga o le Tafiesea o Soo Se Ituaiga Faailoga Tagata Faasaga i Tina ma Tamaitai, ma sa ia faaosa mai i tulaga tau ripotiina o le Feagaiga ma auala e mafai ai ona faaoga e Samoa le taimi e ripoti ai e siitia ai le tulaga o tina ma tamaitai o Samoa. O se tasi o vaega o le polokalame sa latou asia ai nuu ma afioaga sa aafia i le galulolo, ma malolo ai mo le taumafataga o le aoauli sa saunia e Komiti a Tina ma Tamaitai o Vavau faatasi ai ma le tuuina mai o meaalofa faa Samoa mo le aumalaga. Sa asia foi e le aumalaga nisi o poloketi o loo taulamua ai tina ma tamaitai ma o loo faatupeina e le Malo o Saina, faapea nisi o poloketi o loo faafoeina e le Faalapotopotoga a Tamaitai Faipisinisi.

## **2.8 Galuega mo Tagata e iai Manaoga Faapitoa**

O le tausaga lenei na pasia ai e le Kapeneta le Faiga Faavae Aoao mo i Latou e iai Manaoga Faapitoa. O lenei galuega na faatinoina ina ua avea le Matagaluega o Tina ma Tamaitai Atinae o Nu'u ma Afioaga ma Agafesootai ma taiulu mo le faamaopoopoina o galuega mo i latou e iai manaoga faapitoa. Sa tuufaatasiina lenei faiga faavae e ala i faatalatalanoaga ma le Komiti Galue mo i latou e iai Manaoga Faapitoa lea e taitaifono ai le Matagaluega o Tina ma Tamaitai Atinae o Nu'u ma Afioaga ma Agafesootai. O le Komiti Galue e aofia ai sui mai Matagaluega o le Malo faapea Faalapotopotoga Tumaoti.

Mo le tausaga faaletupe lenei, sa tapenaina ai se Pepa Faatalatalanoa mo le agai atu o Samoa i le avea ma sui auai o le Feagaiga mo Aia Tatau a Tagata e iai Manaoga Faapitoa. Sa mafai ona tuufaatasia lenei galuega e ala i le fesoasoani a le Faufautua Faapitoa i Faiga Faavae a le Matagaluega ma o le a taiala ai le faasologa o isi laasaga o lumanai i auala e tatau ona uia ma le taimi talafeagai e mafai ai ona sainia e Samoa le Feagaiga Faavaomalo mo Tagata e iai Manaoga Faapitoa.

## **2.9 Fesootaiga ma isi Vaega o le Malo**

O loo faamaotiina mai lalo o le Manulauti a le Matagaluega le galulue soosootauau faapaaga e ala i pulega lelei ina ia ausia taunuuga lelei i tullaga tau agafesootai ma le tamaoaiga mo nuu ma afioaga. O le agaga lea o loo i tua ane o le manaoga ina ia faamalosi faiga faa-paaga ma lelei fesootaiga soosootauau ma vaega eseese, ona o matafaioi faaletulafono a le Matagaluega. O lenei galuega soosootauau sa faatinoina e ala i fonotaga

ma faatofalaiga, aoaoga ma fonotaga faale atunuu sa faamaopoopoina e le Matagaluega, faapea fonotaga faapena sa faamaopoopoina e isi vaega.

O le fesootai vavalalata ma isi Vaega e maua ai avanoa e faaleoina ai ma amanaia mataupu patino i tina ma tamaitai, tupulaga talavou ma tamaiti i galuega a isi Vaega. E iai mutaaga o punaoa o loo i le Matagaluega ae o le fesootaiga vava lalata ma isi Vaega o le a fesoasani ai i le ausiaina o taunuuga lelei mo le atinaeina o agafesootai ma le tamaoaiga o nuu ma afioaga i le alualu mamao. Mo le tausaga faaletupe lenei, sa galulue soosootauau ai le Matagaluega ma isi Matagaluega i a latou polokalame pei o le Talomua, Uunaia o le Soifua Maloloina, Polokalame Sauniuni mo Faalavelave Faafuasei Faalenatura, Puipuiga faaleoleo mo Nu'u ma Afioaga, ma le Suiga o le Itu Auala, ua na o ni nai vaega laiti ia ua taua. O ia polokalame sa faaaua atu i le galuega a Sui o le Nu'u ma Sui Tamaitai o le Nu'u ma maua ai le avanoa e talosagaina ai nuu ma afioaga ina ia latou auai ma lagolago nei atinae o loo taulamua atu ai le Malo.

### **Aafiaga i Galuega Faatino o le Galulolo**

E ese mai le tele o ana fesootaiga soosootauau ma isi Vaega ma galuega faaauau, sa tele se aafiaga o le Matagaluega i galuega fesoasani o le Galulolo e ala i le Polokalame Fesoasoani mo i latou na aafia, o le tufatufaina o fesoasani moomia, o le Fesoasoani Faamafanafana ma le Faapapai Atua ona o Mafatiaga Faalemafaufau ma le Galuega mo le Toe Faaleleia o Nu'u ma Afioaga na aafia. Sa tu malosi le Matagaluega i lona tiute o le fesootai ma Sui o le Nu'u ma Sui Tamaitai o le Nu'u ina ia tulai mai e faatino lo latou tiute i taimi moomia a o faagasolo galuega fesoasoani o le Galulolo.

E le fesiligia le iai o luitau o le faatinoga o lenei galuega aua o se tulaga na matua faateia uma ai le aoa o le atunuu ma sa vave ona fetuunai tiute o nisi o le aufaigaluega ina ia tali atu i manaoga o le taimi o faalavelave, ina ia le tuua ai foi le faaauauina o tiute masani ma galuega fuafuaina. O se tasi o luitau tele o le taimi tonu lea ua tuua ai le galuega e le sa avea ma Ofisa Sili o Pulega ma ua leai ai se Ofisa Sili i le taimi tonu na faasalalauina ai le iai o le atunuu i lalo o le tulaga o faalavelave faafuasei. Sa gafatia lava le taumafaiga a le Matagaluega i lalo o le taitaiga a le Sui Ofisa Sili o Pulega e ui o se tulaga faateia faatoa oo uma iai taitai o le Matagaluega i le tulai mai o lenei faalavelave. O se tasi o lesona taua na maua mai i lenei faalavelave o le manaomia lea o le toe asia o le matafaioi a le Matagaluega lenei i totonu o le Fuafuaga Aoa mo Faalavelave Faafuasei. O le a faaauauina lenei talanoaga pe a oo ina iloiloina lea Fuafuaga i lalo o le taitaiga a le Matagaluega o Punaoa Faalenatura ma Siosiomaga.

E le gata i lea, sa taulamua foi Sui o le Nu'u ma Sui Tamaitai o le Nu'u e aoina ma faamaopoopoina fesoasani mai nuu ma afioaga o Upolu ma Savaii. Sa tuuina atu uma nei fesoasani i le Ofisa Tutotonu o Faalavelave Faafuasei mo le faasoaina atu i nuu na aafia i le galulolo.

## **2.10 Auaunaga Faa-Lomitusi**

O le Lomitusi a le Malo o loo faaauauina pea le faatinoina o ona tiute faaetulafono I lalo o le Vaega mo Lomitusi a le Matagaluega. Sa faatinoina lava galuega masani a le vaega o lomitusi i lenei tausaga faaletupe, faaopoopo iai ma le lolomiina o pepa palota o le Palota laitiiti mo Itumalo o Faleata Sisifo ma Safata lea na faatinoina i le masina o Aperila 2010. O se oototoga o galuega faatino a le Vaega o Lomitusi o loo lisiina i lalo, ae o le auiliiliga o loo atagia i totonu o le Auivi o loo faapipiina atu.

### **Lomiga**

I totonu o le tausaga faaletupe lenei, e 400 Tala o le Tupe Faataitai, 400 Tala o le Tupe ua taliaina, 3000 Ripoti Faaletausaga, 15,000 Savali (Fanua ma Suafa), 7000 Savali faapalagi lolomiina i vaiaso taitasi, 30,000 pepa o faamatalaga faalauiloa, 30,000 tusi o faamtalaga faalauiloa, 300 Saunoga Faa Minisita o le Tala o le Tupe 2010/2011 na lolomiina. O loo faalia foi I faamaumauga le siitia o le numera o tusi ua lolomiina pei o tusi faitau tetele, tusi o tala pupuu, nusipepa o faamatalaga ma puletini faalemasina. Ua mafai ona faatinoina nei galuega uma ona o le iai o masini lomitusi lelei faaneionapo.

### **Lomiga Lautele**

E 89 pasene o galuega lolomi i lalo o Lomiga Lautele na faatinoina I totonu o le tausaga faaletupe 2009/2010. O le 8 pasene lea ua siitia ai le faatinoina o lomiga lautele, e afua mai i le siitia o le numera o tagata tafafao mai fafo faapea tagata asiasi mai i le taimi o aso malolo ma sa moomia ai le toe lolomiina o Pepa Faatumu mo tagata taunuu mai ma tagata malaga i fafo. E 6000 tusi risiti na lolomiina i taimi moomia; 2000 tusi o risiti mo auaunaga faatino; 70000 pepa ulutala; 4000 pepa faapisinisi; 100,000 pepa faatumu faafomai; 200,000 pepa faatumu o tagata taunuu mai fafo; 200,000 pepa faatumu a tagata malaga atu i fafo; 20,000 pepa palota; 2000 pepa palota faapitoa; 19 lola palota e iai ata.

### **Auaunaga**

Ua tele le suiga i le siitia o le tulaga e faatino ai auaunaga faalomitusi i totonu o vaega taitasi o le Vaega mo Lomitusi, talu ona maua le fesoasoani tai masina mai Tagata e iai Tomai Faapitoa mai fafo, e ala i masini ma le faailoaina mai o isi oloa fou o loo i le maketi. O lenei fesoasani faapitoa ua mafai ai nei e le auaunaga a le Vaega mo Lomitusi ona tuuina atu auaunaga faa faufautua i Matagaluega a le Malo Faalapotopotoga ma le atunuu lautele i mataupu patino i le lolomiina o tusi. O nisi o ia galuega e aofia ai le taliina o fesili e faaoo atu e fesiligia ai tau o latou auaunaga, auiliiliga o le faatinoga o galuega lolomi, faavasegaina o le tau o galuega faatino ma le taimi e faatino ai lomiga. E silia i le 30 faafesili sa mauaina i vaiaso taitasi i totonu o le tausaga faaletupe lenei.

### **Pepa Lolomi mai Fafo**

E 4 oka o pepa lolomi e tuuina atu pe a mavae le tai tolu masina, fuafua lava i le ituaiga pepa manaomia mo lomiga. i le tausaga lenei, e fitu uta o pepa na taunuu mai I totonu o le taimi fuafuaina ma lelei atoatoa, ona o le vave o le tali mai a kamupani o loo gaosia nei pepa faapea le faatuatuaina o auaunaga a kamupani vaa.

## VAEGA 3: ATINAEINA O TOMAI & AGAVAA O LE AUFALUEGA

Sa maua e le aufaigaluega a le Matagaluega nisi o avanoa e atinae ai ma tapueina o latou tomai ma agavaa mo le faatinoina o latou galuega. O le tele o nei avanoa sa faatupeina mai e paaga faavaomalo ma faaitulagi, ma sa matua faatauaina e le Matagaluega nei avanoa talu ai le moomia o le iai o se aufaigaluega e lava le tomai ma le silafia. Mo le tausaga faaletupe lenei sa mafai ona auai atu le aufaigaluega mai vaega taitasi i nisi o polokalame ma aoaoga mo le atinaeina o latou tomai faapitoa. O nei polokalame e aofia ai aoaoga, fetufaaiga ma fonotaga. Ua avea lava nei avanoa uma o se vaega o le atinaeina o tomai faapitoa o le aufaigaluega a le Matagaluega.

### 3.1 Fonotaga Faaitulagi ma Faavaomalo

| Aufaigaluega & Tulaga Tofi  | Vaega  | Fonotaga  | Faalapotopotoga & Atunuu na talimalo.  |
|---|--|---|--|
| Leituala Kuiniselani Toelupe Tago:<br><i>Ofisa Sili Lagolago – Vaega mo Tina ma Tamaitai</i><br><br><i>Ofisa Sili o Pulega.</i> | Tina ma Tamaitai,<br>Ofisa o le Ofisa Sili o Pulega. | Iloiloga faaletausaga a le polokalame mo le puipuia o fanau a le faalapopotoga o le UNICEF<br><br>Iloiloga faaitulagi a le atu Asia ma le Pasefika o le taiala o le “Beijing Declaration and Platform for Action” Novema 2009.<br><br>Fonotaga lona 54 a le Komisi mo tulaga o tamaitai.<br><br>Fonotaga mo faauluuluga o faalapopotoga a Tina ma Tamaitai a Malo o le Taupulega. | UNICEF, Nadi, Fiti<br><br>UNESCAP, Bangkok, Thailand<br><br>UNDAW, Niu Ioka, Amerika<br><br>Failautusi a Malo o le Taupulega, Niu Ioka, Amerika. |
| Vanessa Barlow Schuster – <i>Faufautua Faapitoa i Mataupu tau Faiga Faavae</i>  | Ofisa o le Ofisa Sili o Pulega                       | Iloiloga faaitulagi a le atu Asia ma le Pasefika o le taiala o le “Beijing Declaration and Platform for Action” Novema 2009.<br><br>Fonotaga a Minisita mo mataupu tau i manaoga faapitoa.  | UNESCAP, Bangkok, Thailand<br><br>Failautusi o le Fono a le Pasefika (PISF), Atu Kuki  |

|   |                  |   |   |
|---|------------------|---|---|
|   |                  | Fonotaga mo tuufaatasia o le faavaa mo le aofia ma amanaiaina   | Failautusi o le Fono a le Pasefika (PIFS), Vanuatu  |
| Louisa Apelu: <i>Ofisa Sili Lagolago Vaega mo Tina ma Tamaitai.</i> | Tina ma Tamaitai | Fonotaga lona 54 a le Komisi mo tulaga o tamaitai.<br><br>Fonotaga Faaitulagi mo le faaleleia ma le faamalosia o taiala mo le puipuiga o agafesootai<br><br>Faatalatalanoaga faaitulagi o Mataupu e aafia ai alii ma tamaitai, aganuu ma le tulafono<br><br>Semina a atunuu o le Oceania e faatatau i tamaitai ma taaloga | UNDAW, Niu Ioka, Amerika<br><br>Faletupe o Atinae a Asia: Manila Filipino<br><br>Failautusi a Malo o le Taupulega: Port Moresby, Papua Niu Kini<br><br>Komiti o le Olimipeka: Guam              |
| Sydney Faasau: <i>Ofisa Sili Lagolago Vaega mo Tupulaga Talavou</i> | Tupulaga Talavou | Koneferenisi mo Mataupu tau Taaloga mo Tupulaga Talavou<br><br>Fonotaga a le Faalapotopotoga Faavaomalo mo Leipa i le Atinaeina o Pisinisi a Tupulaga Talavou<br><br>Iloiloga Ogatotonu a le Polokalame o Malo o le Taupulega mo Tupulaga Talavou   | Faalapotopotoga Soka a le Oceania Ueligitone Niu Sila, Mati 2010<br><br>Faalapotopotoga Faavaomalo mo Leipa<br><br>Polokalame o Malo o le Taupulega mo Tupulaga talavou Faia i Vanuatu, Me 2010 |
| Maulolo Tavita: <i>Ofisa Sili Lagolago Vaega mo le Lotoifale</i>    | Lotoifale        | Fonotaga Komiti Faufautua a Malo o le Taupulega mo Pulega Lelei<br><br>Fonotaga Komiti Faufautua a Malo o le Taupulega mo Pulega Lelei  | Malo o le Taupulega mo Pulega Lelei: Brisbane, Ausetalia - Aperila 2010<br><br>Malo o le Taupulega mo Pulega Lelei: Oketopa 2009  |

|  |  |  |  |
|--|--|--|--|
| Faauiga Mulitalo: <i>Ofisa Sili Lagolago Vaega mo Auaunaga Lautele</i>   | Auaunaga Lautele   | Faatalatalanoaga faaitulagi mo le faamautuina o le tusi tauave a le Pasefika mo le feagaiga tau aia tatau. Nadi, Fiti. 11 - 13 Novema 2009                         | ESCAP/Faletupe atinae a Asia/Ofisa Tutotonu o le Pasefika UNDP. Nadi, Fiti.  |
| Wesley Simamao - <i>Ofisa Sinia Autu o Tupe</i>  | Auaunaga Lautele   | Aoaoga mo le puleaina o tupe mo le Polokalame o Pulega Lelei, Suva, Fiti. 23 - 30 Iulai 2009.  | Fono a Malo o le Taupulega i Pulega Lelei, Suva, Fiti  |
| Telea Kamu Potogi - <i>Ofisa Sinia Autu mo le Atinaeina o Nuu i Tua</i>  | Lotoifale  | Fonotaga mo Pulega Lelei   | Fono a le Taupulega mo Pulega Lelei  |
| Vaialia Iosua: <i>Ofisa Sinia mo le Atinae o Nuu</i>   | Tina ma Tamaitai   | Tapenaga mo faalavelave faafuasei ma faalavelave faalenatura.<br><br>Uunaia ma atinaeina o atinae faaitulagi e faogaina ai oa o le lotoifale mo Saina ma Indonesia | JICA, Iapani   |
| Tuioti Sakaria Taituave - <i>Ofisa Autu mo le Atinae o Nuu ma Afioga</i>   | Tina ma Tamaitai   | Fonotaga faaleaoaoga faavaomalo i mataupu tau kenera, tekonoosi ma auala e faamasani ma faaitiitia ai aafiaga o suiga o le tau                                     | Manila, Filipino.  |
| Fetulasi   | Tina ma Tamaitai   | Aoaoga mo le atinaeina o Nuu   | Komisi a le Pasefika i Saute, CETC, Suva, Fiti.  |
| Seletuta Visiesio Pita, <i>Ofisa Autu Polokalame o le TALAVOU</i>  | Tupulaga Talavou   | Fonotaga lona 54 a le Komisi mo Tulaga o Tamaitai.<br><br>Faaaliga a Tupulaga Talavou a le Pasefika  | UNDAW, Niu Ioka, Amerika, Mati 2010<br><br>SPC / Malo o Fiti   |
| Owen Ah Ching - <i>Ofisa Polokalame ma Aoaoga</i>  | Tina ma Tamaitai   | Polokalame tau taitaiga a Asia ma le Pasefika e faatatau i le siosiomaga mo atinae tumau ma faaauuina  | Shanghai, Saina.   |
| Faasili Afamasaga: <i>Ofisa Sili Lagolago Vaega o Suesuega, Faiga Faavae, Fuafuaga ma Faamatalaga Faamaumauina</i> | Suesuega, Faiga Faavae, Fuafuaga ma Faamatalaga Faamaumauina | Fonotaga faaitulagi a le Vaega mo le Soifua Manuia o Tagata.<br><br>Fonotaga o Faatalatalanoaga i  | Vaega o Auaunaga Fesoasoani a le Pasefika (Pacific Humanitarian Team) Nadi, Fiti, 2 - 4 Tesma 2009<br><br>RRRT/SPC |

|  |   |   |   |
|--|---|---|---|
|  |   | tulafono e puipuia ai Sauaga faasaga i tina ma tamaitai.  | Nadi, Fiti 20 - 24 Aperila 2010                                     |
| Elizabeth Ah Poe - <i>Ofisa mo Suesuega</i>                            | Suesuega, Faiga Faavae, Fuafuaga ma Faamatalaga Faamaumuina | Tipiloma Vaega 3,4,5 o le Polokalame mo le Atinae o Nu'u  | Suva, Fiti  |
| Roger Stanley - <i>Ofisa Autu Faiga Faavae Fuafuaga ma Faamaumuina</i> | Suesuega, Faiga Faavae, Fuafuaga ma Faamatalaga Faamaumuina | Aoaoga mo le atinaeina o le aufaigaluega i mataupu tau aoga, agafesootai ma le manuia lautele o I latou e iai manaoga faapitoa. | JICA, Iapani  |
| Siufaga Soloi Avei<br><i>Ofisa Sinia mo Tupulaga Talavou</i>           | Tupulaga Talavou  | Faaaliga a Tupulaga Talavou a le Pasefika   | SPC / Malo o Fiti   |
| Faaifoaso Moala<br><i>Ofisa mo Tupulaga Talavou</i>                    | Tupulaga Talavou  | Faaaliga a Tupulaga Talavou a le Pasefika   | SPC / Malo o Fiti   |
| Angharad Toma<br><i>Ofisa Sinia Polokalame o le TALAVOU</i>            | Tupulaga Talavou  | Fonotaga Tapenapena mo le Konosefenisi a Tupulaga Talavou   | ESCAP<br>Faia i Vanuatu   |
| Kaisarina Moananu<br><i>Ofisa mo Tupulaga Talavou</i>                  | Tupulaga Talavou  | Koneferenisi mo Mataupu tau Taaloga mo Tupulaga Talavou   | Faalapotopotoga Soka a le Oceania<br>Ueligitone Niu Sila, Mati 2010 |

### 3.2 Fonotaga i totonu o le Atunuu

| <b>Aufaigaluega &amp; Tulaga Tofi</b>   | <b>Vaega</b>     | <b>Fonotaga</b>   | <b>Faalapotopotoga na talimalo.</b>                                    |
|---|------------------|---|--|
| Robert Wong Sin: <i>Ofisa mo Polokalame</i>   | Tina ma Tamaitai | Fonotaga a le Soifua Maloloina                                | Matagaluega o le Soifua Maloloina.                                     |
| Owen Ah Ching: <i>Ofisa Polokalame ma Aoaoga</i>  | Tina ma Tamaitai | Fonotaga Faaleaoaoga mo le Soifua Maloloina                   | Matagaluega o le Soifua Maloloina.                                     |
| Alana Mapu - <i>Ofisa Sinia i Polokalame ma Aoaoga</i><br>Tuioti Sakaria - <i>Ofisa Sinia Autu mo le atinae o Nu'u</i><br>Robert Wong Sin: <i>Ofisa mo Polokalame</i> | Tina ma Tamaitai | Iloiloga o le aafiaga o galuega faatino tau soifua maloloina. | Matagaluega o le Soifua Maloloina.                                     |
| Owen Ah Ching: <i>Ofisa mo Aoaoga</i><br>Vaialia Iosua, <i>Ofisa Sinia mo le atinae o Nu'u</i>  | Tina ma Tamaitai | Aoaoga mo tomai tau suesuega.                                 | Matagaluega o Tina ma Tamaitai, Atinae o Nu'u ma Afioga ma Agafesootai |

|   |  |   |   |
|---|--|---|---|
|   |  |   | Polokalame tau aooga a le Ofisa o le Komisi o Galuega a le Malo   |
| Owen Ah Ching: <i>Ofisa Polokalame ma Aooga</i><br>Robert Wong Sin: <i>Ofisa mo Polokalame</i>                  | Tina ma Tamaitai   | Aooga i le polokalame o le Software Samoa a le CSL ma le Vaega o Fuainumera Faamaumauina.   | Vaega o Fuainumera Faamaumauina   |
| Robert Wong Sin: <i>Ofisa mo Polokalame</i>   | Tina ma Tamaitai   | Aooga mo e faia aooga faatatau i le “Pacific Financial Literacy”  | Faletupe Tutotonu o Samoa   |
| Suega Galuemalemana: <i>Ofisa mo le Atinae o Nu'u</i>   | Tina ma Tamaitai   | Aso o Taumafa a le Lalolagi   | Matagaluega o Faatoaga, Vaomatua ma Faigafaiva.   |
| Faasili Afamasaga<br><i>Ofisa Sili Lagolago mo Suesuega, Faiga Faavae, Fuafuaga ma Faamatalaga Faamaumauina</i> | Suesuega, Faiga Faavae, Fuafuaga ma Faamatalaga Faamaumauina | Fonotaga a le Komiti Iloiloina Tulafono<br><br>Komiti Faafae a le Vaega mo Tulafono ma Faamasinoga<br><br>Komiti Galue mo le toe Iloiloina o le Tulafono o Falepuipui<br><br>Fonotaga a le Komiti Faatonu a le PUMA<br><br>Faatalatalanoaga a le Malo i fesootaiga faanei ona po.<br><br>Faatalanoaga e faatatau i le pepa fesili mo le Tusigaigoa o le Faitau Aofai o Tagata ma Fale<br><br>Fonotaga a le Komiti Faatonu e Pasiaina Ata Tifaga | Ofisa o le Loia sili<br><br>Komisi toe iloiloina tulafono<br><br>Matagaluega o Leoleo ma Falepuipui<br><br>Matagaluega o le Siosiomaga, Punaoa Faalenatura, ma le Vaaitau<br><br>Matagaluega o Fesootaiga, ma Faamatalaga Faatekonolosi.<br><br>Ofisa o Fuainumera Faamaumauina<br><br>Matagaluega o Faamasinoga. |

|  |   |  |   |
|--|---|--|---|
|  |   | Fonotaga a le Komiti mo Faalavelave Faafuasei. Fonotaga a le Komiti Faufautua mo Faalavelave Faafuasei (tali atu i taimi o galuafi, faapea galuega toe faaleleia)                    | Matagaluega o Siosiomaga, Punaoa Faalenatura ma le Vaaitau  |
| Vanessa Schuster<br><i>Faufautua Faapitoa i Faiga Faavae</i>   | Suesuega, Faiga Faavae, Fuafuaga ma Faamatalaga Faamaumauina  | Fonotaga a le Komiti Faafoe mo le Suesuega ma le iloiloina o Fefaatauaiga Tuu faatasi.<br><br>Fonotaga a le Komiti Faafoe mo Tulafono ma Faamasinoga                                 | Matagaluega mo Mataupu tau i le Va i Fafo<br><br>Ofisa o le loia sili o le Malo   |
| Filemoni Crawley<br><i>Ofisa Autu o le Polokalame mo le Tafisea o Sauaga</i>   | Suesuega, Faiga Faavae, Fuafuaga ma Faamatalaga Faamaumauina. | Komiti mo le iloiloina o Tulafono  | Ofisa o le Loia Sili  |
| Roger Stanley<br>Filemoni Crawley<br>Seuamuli Veni<br>Eseta Kelekolio<br>Vinepa Seumanutafa<br>Veei Enosa<br>Elizabeth Ah Poe<br>Faavesi Asi<br>Mamea Ulafala<br>Lumaava tasi Sanele | Suesuega, Faiga Faavae, Fuafuaga ma Faamatalaga Faamaumauina  | Aoaoga mo Tomai ma Agavaa e faatino ai Iloiloga ma suesuega i mataupu tau agafesootai  | Ofisa mo Aoaoga a le Oloamanu   |
| Roger Stanley<br><i>Ofisa Autu Faiga FuaFuaga ma Faamaumauga</i>   | Suesuega, Faiga Faavae, Fuafuaga ma Faamatalaga Faamaumauina  | Fonotaga a le Komiti Galue a le Vaega mo Tulafono ma Faamasinoga   | Ofisa o le Loia Sili  |
| Laulu Alosio Tevaga<br><i>Ofisa Sili Lagolago Vaega mo Lomitusi</i>  | Lomitusi  | Fonotaga a le Komiti Faufautua mo Faalavelave Faafuasei<br><br>Fonotaga a le Komiti Faatonu a le Pulega o Tusipasi ma Faailoga Taualoa<br><br>Fonotaga a le Komiti Faatonu a le PUMA | Matagaluega o Siosiomaga, Punaoa Faalenatura ma Vaaitau<br><br>Pulega o Tusipasi ma Faailoga Taualoa<br><br>Matagaluega o Siosiomaga, Punaoa Faalenatura ma Vaaitau |

|   |                  |   |                                       |
|---|------------------|---|---------------------------------------|
|   |                  |   |                                       |
| Wesley Simamao<br><i>Ofisa Autu Vaega o Tupe</i>              | Auaunaga Lautele | Aoaoga mo i latou e faatinoina aoaoga, faatinoina i le Faletupe Tutotonu 9 - 13 Aukuso 2009 | UNDP                                  |
| Taupule Matautia<br><i>Ofisa Sinia o Faila ma Faamaumauga</i> | Auaunaga Lautele | Aoaoga o le "Code of Best Practice" faatinoina i le Tuutuuleloto Hall, 15 - 17 Iulai 2009   | Matagaluega o Aoga, taaloga ma Aganuu |

## VAEGA E 4: TALA FAATATAU O LE TUPE A LE MATAGALUEGA

| NUMERA O GALUEGA FAATINO | Faamatalaga  | Tupe Faatatau  |
|--------------------------|--|--|
| 1                        | Fautuaga tau faiga faavae i le Minisita                  | Tagata Faigaluega \$884,514<br>Tupe alu mo le faagaioiga \$80,564    |
| 2                        | Galuega lagolago i le Minisita                           | Tagata Faigaluega \$83,422<br>Tupe alu mo le faagaioiga \$97,500     |
| 3                        | Galuega e faaleleia ai le atinaeina o tina ma tamaitai   | Tagata Faigaluega \$853,658<br>Tupe alu mo le faagaioiga \$87,747    |
| 4                        | Galuega faatino mo le puipuiga o fanau                   | Tagata Faigaluega \$157,431<br>Tupe alu mo le faagaioiga \$21,500    |
| 5                        | Auaunaga mo le atinae o nuu ma afioaga                   | Tagata Faigaluega \$1,958,493<br>Tupe alu mo le faagaioiga \$104,532 |
| 6                        | Auaunaga mo le atinae o tupulaga talavou                 | Tagata Faigaluega \$218,000<br>Tupe alu mo le faagaioiga \$57,890    |
| 7                        | Auaunaga tau lomitusi                                    | Tagata Faigaluega \$406,256<br>Tupe alu mo le faagaioiga \$314,044   |
| 8                        | Suesuega, faiga faavae ma fuafuaga                       | Tagata Faigaluega \$409,785<br>Tupe alu mo le faagaioiga \$42,300    |
| Vaega o auaunaga autu    | Auaunaga lautele ma faaofisa                             | Tagata Faigaluega ma Tupe alu mo le faagaioiga \$639,696             |
|                          | <b><i>TALA FAATATAU O LE TUPE MO GALUEGA FAATINO</i></b> | <b>\$6,417,331</b>   |

### Galuega i le avea ma Sui o le Malo

| Galuega Faatino   | Tupe Faatatau        |
|---|----------------------|
| Polokalame mo Autalavou Malo o le Taupulega                           | \$48,399             |
| Aso Tina  | \$10,000             |
| Aso Tama  | \$10,000             |
| Fuataga o le ie o le Malo   | \$125,000            |
| Totogi o lisi   | \$450,000            |
| Lafoga Totogi mo le VAGST   | \$199,206            |
| <i>Aofaiga o galuega e avea ai ma sui o le Malo</i>                   | <i>\$842,605</i>     |
|   |                      |
| <b>Aofai atoa o le Tupe Faatatauina mo le Matagaluega 2009 / 2010</b> | <b>\$7, 259, 936</b> |

## FAAFETAI

E fia momoli le agaga faafetai o le Matagaluega i le lagolago faifai-pea a le Afioga i le Minisita o Tina ma Tamaitai Atinae o Nuu ma Afioga ma Agafesootai, ina ia faamautinoaina o loo faatinoina matafaioi, polokalame ma auaunaga faatino na fuafuaina i lenei tausaga faaletupe 2009 / 2010. E faafetaia foi le sao taua ma le lagolago a paaga uma i galuega fai o lenei tausaga. E fia faaleo le agaga faafetai o le Matagaluega i le galulue punoua'i ma le lē faalogologo-tigā o Sui o le Nuu, Sui Tamaitai o le Nuu faapea le Komiti o le Faleula i lenei tausaga faaletupe, aemaise lava lo latou sao i le taimi na aafia ai lo tatou atunuu i le Galuafi o le 2009.

E fia faamauina foi le agaga faafetai i le onosai o le aufaigaluega o le Matagaluega i le feagai ai ma tiute ma faiva o lenei tausaga faaletupe. E tusa ai ma le tele o luitau na feagai ai i lenei tausaga, ua talafeagai ona momoli le faamalo i le aufaigaluega ona ua mafai ona tatou taunuu manuia mai i le faaiuga o lenei tausaga. Malo lava le galulue ma le onosai!

E faaiuina se faamatalaga, i le faafetai faapitoa i le taitaiga ma le faafoega a le Afioga ia Luagalau Foisagaasina Eteuati Shon, o le sa tu i le foe o le Matagaluega seia faaiuina lana tautua ia Setema 2009. O le Afioga Luagalau sa taitaiina le Matagaluega mo tausaga e tele, ma e faamauina le agaga faafetai mo galuega lelei uma sa ia faatinoina mo le Matagaluega. Malo tautua.

## FAASINO UPU

|     |   |                       |
|-----|---|-----------------------|
| ANM | - | Aiga ma nuu Manuia    |
| SN  | - | Sui o le Nuū          |
| STN | - | Sui Tamaitai o le Nuū |